

皇明嘉隆聞見紀

巳



皇明嘉隆聞見紀卷之六

己亥嘉靖十八年

春正月庚午朔○禮部議進喪服諸制 上令畫圖註釋呈覽○諭巡

承天時勅脩大峪山陵命奉迎獻皇帝梓宮又勅巡撫湖廣副都御史陸杰等迎護梓宮防衛周密勅已下有言顯陵山川之勝不宜遷祔者

上乃欲巡承天躬閱諭曰朕惟孝子事親送終為大皇考顯陵日者

建造狹隘雖嘗增修猶多未稱朕將躬詣陵下與諸左右大臣周閱山川更卜吉兆重建玄宮以安皇考皇妣之靈擇於二月望日子夜發京

中外其悉知之于是給事中魯熒等御史劉仕賢等各奏留不報吏部

尚書許讚等亦各疏陳請勿南巡 上曰今事已定而惑於群議非實

有諫止之忠宜思之勿為此沽名之舉左都御史王廷相特疏進言聖駕南巡有謂輦路所經災荒特甚盜賊蝟起恐有犯屬車之清塵者有

謂近邊虜酋日伺邊釁變輿遠涉恐有突至昌平逼京師者有謂扈從軍校內外從官不下數萬恐費糧草供應不貲者然患猶在外處置得宜可保無事臣之所慮則皇上玉體時間不快登歷長途衝冒風霜六氣襲之五內受之萬一違和誰其任焉且巡幸一事所關甚大居中可
以制外機權由已處外必假託付機權屬人况勞人動衆加以苦急無聊患起不虞理勢或有臣請當事者自行必能辦事所供賞賜留為修建之用不惟免皇上遠行之勞且大事易襄意外無變一舉三得疏入時 上孝思深篤南行之議已決雖知其忠不及用也○詔起故大學士翟鑾為兵部尚書兼右都御史行邊使 上將南巡念邊防事重命分勞沿邊將士○進武定侯郭勛為翊國公以去冬祇薦皇天上帝冊表勞也○命選官僚時吏部上言冊立東宮在邇宜慎選官僚以禪聖

功 上命大學士夏言顧鼎臣遴選勿論卿貳臺諫即官致仕間居一體拔用一時奔競之徒內外蜂起既而選定溫仁和等三十有七人中多不愜人望者給事中周琬力以為言章下吏部以將巡承天姑寢不議覆○二月冊立皇太子日下五色雲見 上以南巡在邇乃冊立皇太子載墜為皇太子當午日下有五色雲見長徑二丈形如龍鳳是為卿雲大學士夏言顧鼎臣以聞 上命禮部擇日昭謝尚書嚴嵩請於翌日祈穀禮畢御奉天殿受賀 上曰慈寧几席未除其免稱賀○冊封裕王景王上既立皇太子乃封皇三子載 為裕王皇四子載圳為景王時皇五子載墜皇六子載整皇七子載墳皇八子載壘俱殤追封為穎傷王戚懷王薊哀王均思王○大學士張孚敬卒贈太師謚文忠孚敬永嘉人慷慨任事不避嫌怨 上親按古謚法以其危身奉上特謚文忠眷顧之厚終始不替云

謹按鄭端簡公曉曰張公晚年發憤抗朝議受知聖明得柄用攬才俊謝苞苴孤立行一意元侯中貴戢戢歛束要亦有以服其心矣又許文簡公曰公天性孝友氣度朗豁博極群書奇偉迥特非時俗膚淺所能揆測及當事涖政執法以往剛崛不回遭遇聖明建明大禮乃知殷宗思治夢帝賚傳周宣中興嶽降生申有由然也

命皇太子監國以宣城伯衛鐔為留守使大學士顧鼎臣同留守使本兵張璫叅預機務與太監麥福協守及分守京城官十八人賜鼎臣勅曰朕幸承天已冊東宮監國特留卿贊輔協董文武重臣居守內自掖庭外而都城遠及邊鄙百司庶務悉以付卿事湏入告者以賜印密啟○上幸承天府時少師夏言學士陸深侍讀屠應竣胡經等尚書許讚李廷相嚴嵩楊志學侍郎袁宗儒張衍慶江曉高韶及翊國公郭勛等扈從 上命戶部侍郎高韶偕郎中六人齎白金三十萬以備途中供

億勿令缺乏其扈從諸官兵部印給關符每一署官各一備列供需事目以速闕發織悉俱備乙卯車駕發京師○駕次彰德趙王迓帝於漳水朝於行宮○駕次衛輝汝王來朝行宮災奪河南撫按等官初上勅止汝王勿出遠迓及車駕至衛輝御行宮王乃來朝王 上父行由東闈入御前行朝見禮 上避座受之詔加歲祿五百石賜金幣是夕有火起行宮延及御寢 上遑遽莫知所避錦衣衛指揮陸炳排闥入負帝出燭中宮婢內使焚死者十數人鹵簿服御焚燬殆半 上命王廷相檢括法駕三日乃行及抵亢村河壩行殿復災 上大怒命逮繫撫按二司官於是巡撫易瓚巡按馮震布政使姚文清按察使龐浩等俱下詔獄奪其官因繫有司以示儆○命祭嶽瀆及古帝王聖賢祠墓初上命禮官朕往過道途凡有附近嶽瀆及古帝王聖賢祠墓預奏遣祭於是次真定望祭恒嶽衛輝祭濟瀆熒澤祭河均州望祭嵩岳俱用

大牢古帝王聖賢遣祭用少牢忠臣烈士祠用脯醢乃遣駙馬都尉鄔景和如裕州祭漢世祖南陽祭諸葛亮襄陽祭羊祜均州祭武當山之神○三月 上至承天府謁皇考於隆慶殿先是庚午車駕次鄭州鄭王周世孫來朝辛未次鈞州徽王來朝詔各加歲祿三百石賜金幣故少保賈詠失朝奪其散官乙亥次南陽唐王來朝已卯至承天府入御舊邸卿雲宮遂祗謁皇考於隆慶殿○上謁顯陵辛巳駕至純德山及紅門降輦稽首遂乘騎登陵山立表於皇考寢陵之北周覽久之命改營焉御製純德山喜而自得之詩命輔臣等屬和壬午詔增顯陵圍垣遂定新玄宮之式自是遷祔之議始寢○享上帝於龍飛殿奉皇考獻皇帝配申申命于龍飛殿祀上帝配以皇考仍親製樂章奏之○祀顯陵乙酉 上祀顯陵悲思瞻敬再製獻陵歌以示大學士夏言禮官嚴嵩等命屬和戊子以大享禮成 上御龍飛殿受群臣朝頒詔天下時

楚王來朝守制侍講學士廖道南衣緋入朝獻南巡江漢賦景雲頌上覽之命付史館賜以酒饌既而以居憂衣緋命奪官永不叙○上駕還京庚辰以回鑾辭告獻皇帝壬辰駕發承天府製思恩賦因念所經供億良苦賜免承天府田賦三年湖廣諸府十之四河南十之三○詔改吏部右侍郎顧璘為工部左侍郎時顯陵肇工命璘領山陵事璘長於料簡而程省費懈調發有制視他所營率損費十五而功實倍之○以方士陶典真為神霄保國宣教高士典真即仲文師事致一真人邵元節元節病不能從南巡乃薦典真 上命給誥印仍許携其家於官○真人邵元節卒贈少師謚文康榮靜元節龍虎山道士始以符籙見上禱雨有應累遷致一真人禮部尚書至是卒賻資甚厚 謹按王司寇世貞謚法考曰方士之有謚也自世宗始也謚而四字淫矣而使方士得之則益淫也又按顧文康夏文愍碑誌云邵初死

內閣擬二謚御批俱用耳

四月詔賑鄭鈞饑民已亥 上次榮澤時鈞州至河大饑野殍相望學士陸深勸撫臣胡績宗請賑績宗唯唯及 上濟河御舟大學士夏言及京山侯崔元同以為言 上為動容命發行帑白金二萬賑之復問曰能活萬人否言奉命傳示於外○命改御史謝少南為左春坊左司直兼翰林院檢討時少南上言慶都乃為帝堯肇封之地堯母乃帝嚳元妃今縣城內陵墓具存當時祀典失于紀載今乘輿親臨千載一會乞賜表揚以弘達孝光巡幸 上曰帝堯父母異陵可見合葬非古即命有司修建祠寢副朕追崇往聖之意謝少南建白可嘉改授左春坊左司直兼翰林院檢討○御史劉士達以巡狩陳言三事一並晉文教二覈吏治三紓民力 上是其言下所司議○山西地震○庚戌彗星見芒長二尺許光指東南掃軒轅北第八星旬日乃滅○聖駕至京師是

月望日壬子 上至京由宣武門還宮往返計兩月云 上入御文華殿命禮官奉告太廟及奉先殿既而御奉天殿受朝○金星晝見○上幸大峪山甲子駕幸大峪召禮部尚書嚴嵩論曰大峪地勢空淒豈如純德山完美謹奉慈宮南祔于是大峪之役始罷○五月令大學士夏言致仕奪其勲階既而召還以為少傅兼太子太傅復入內閣初 上命言選宮僚給事中周琬劾言不公章寢未覆而自悅皇甫洵皆禮官宜從 上南巡者以擬改司直檢討遂留不行及 上至承天頒賜扈從諸臣中官按名唱之悅洵皆不至給事中丁湛遂劾二臣黃緣華階未經部覆尚係卽官避不扈從大不敬 上怒奪官二級外補先是上幸大峪山內閣以居守勅稿進覽遲緩 上責言曰爾職何事此時方呈勅草耶及至承天言有密奏不用原賜印記又命錄原進文字旬餘未上 上責言欺慢狀言具疏引罪 上大怒曰言自微官朕命張

乎敬示令建贊郊禮之儀遂不次進官其所倚任皆朝廷恩眷自當益勵公勤盡忠事主乃每每怠慢不恭昨所選擬宮僚多不稱用密疏既不遵式却借封皮以便私情既不遵奉原賜印記并歷年諭帖可即進繳御前雖無稿其數尚可查無得隱匿取罪宜痛自省改以供職業言復自陳言臣一介凡庸遭逢聖明在上追惟郊祀之儀雖小有論贊實首發淵衷成以睿斷臣實何知何能遂蒙顯擢臣非木石敢不思感恩圖報昨扈從南巡偶以疾昏迷時典禮方殷因勉強赴閣供事至於錄進舊文併撰居守勅稿既失稽遲而密疏之陳又屢違欽式不意聖度優弘勉之省改使得自新復欽奉聖諭令以原賜印記并歷年諭帖進繳臣于恐懼待罪之餘尚有意意外祈恩之望印記之文乃特賜嘉獎聖諭諸帖皆親灑宸翰已編御集當傳萬世惟是臣之家藏實臣遭際之榮為子孫百世之寶今一但追取臣忍舍之乞重加矜念仍以賜臣或

別加罰治則臣死且不朽疏入 上曰言既寶君命手澤可見其實有旨追取數日不繳必有殘壞禮部其亟取以進姑念昔日贊儀郊典革其勲階少師官職其以少保兼尚書學士致仕言乃檢手勅諭帖起自九年至十八年共四百餘道印記一顆具疏上之 上諭吏部閣臣夏言初出朕簡用首因奉示建贊北郊茲典至大言知之真正克贊成之朕嘗曰昔予敬為網常立論正吾父子之名言不忘禍患能贊吾復皇祖初禮二臣於我有助不意言以傲慢之資超進丞弼之任身居是位猶不警勵昨已令去之然朕復念言建助大儀力贊陵議其復少傅兼太子太傅還閣辦事贊終喪禮宜省思盡忠未可怨尤君上也即日任事初言既罷政將行詣闕辭 上遣司禮官止之命還家候旨隨降是諭言即進閣疏謝 上曰覽卿已赴閣朕知悅已卿宜益勵初忠盡心輔政事秉公持正不惟副朕任亦免衆忿也卿其思之言復疏謝且言

自處不敢後于他人一志孤立為眾所忌 上覽之不悅隨詰責之并
殊塗疏中洗改字數處言乃惶恐引罪得旨報聞○詔設興都留守司
上以承天府為興都設留守司統顯陵承天二衛比中都焉建聖諭
碑於承天府榜其城樓曰顯親達孝之城○慈孝獻皇后梓宮發京師
初 上還自大峪乃定議祔葬獻皇后于顯陵卜以是月甲申發慈宮
往葬承天命禮部尚書溫仁和等及諸內侍護從由會通河遡舟南去
既而至漢口江沙淺澁有司懼議所以踈通之策適西山大雨漢水增
漲梓宮得順流而下撫臣以聞 上喜曰朕仰荷天休慈神孔安朕心
寧悅○兵部右侍郎蔡經復討斷藤峽諸盜悉平之詔進經左侍郎加
安遠侯柳珣李少保初柳經承命撫廣集諸司議發兵曰諸君度賊
須兵幾何副總兵張經曰不過萬人蔡經曰太少沈希儀曰非八萬人
不可蔡經曰太多副使翁萬達曰二君言各有據襲而取之曰勦聲罪

討之曰征由張君言勦也由沈君言征也然今賊為倍久矣勦之無功
從沈君言便會朝議欲征安南事遂已公丁等益橫時出殺掠潯人苦
之萬達言之蔡經御史鄒克臣亦贊之經乃會安遠侯柳珣決計發兵
以兵事屬萬達萬達廉得百戶許雄素通賊狀劫之曰能擒公丁貸汝
死不即論如法雄懼請効力自贖萬達佯庇公丁謂仇家誣之耳乃捕
繫許訟公丁者數人公丁果遣人自列萬達亦佯許之又令雄假稱貸
為賄公丁喜益信雄會萬達巡他郡以事屬叅議田汝成汝成召雄申
飭之雄給公丁詣汝成自列言寇堡事繇他徭汝成亦慰遣之乃密授
意城中居民被賊害者家出毆公丁一市皆詳游徼并逮公丁入繫獄
遣雄諭其黨曰寇堡事公丁委罪諸徭果否諸徭遂言事果自公丁聽
論坐不敢黨乃檻致公丁於軍門磔誅之汝成乃言之督府謂首惡既
擒宜乘此時進兵討賊經許之會沈希儀病乃以副總兵張經將左軍

副使翁萬達監之以都指揮高乾將右軍副使梁廷振監之以副使蕭
峴紀功叅政林士元及汝成督餉以是年二月兩軍齊發左軍三萬五
千人分六道攻紫荊石門梅嶺木昂藤冲大坑等巢右軍一萬六千人
分四道攻碧灘羅涿上中下峒等巢南北夾擊賊大窘遂擁眾奔林峒
而東王良輔邀擊之中斷復西奔諸軍合擊大破之斬首一千二百級
復追至羅連山又斬百餘級會平南縣有小田羅應古陶古思諸徭亦
據險弗靖萬達等移兵勦之因招降賊黨二百餘人江南胡姓諸徭歸
順者亦千餘人藤峽復平萬達汝成乃同獻議于督府凡七事一曰編
保甲以處新民二曰立營堡以通江道三曰設督備以控上游四曰改
州治以建屯所五曰清狼田以正疆界六曰處欵兵以慎邊防七曰權
商稅以資公費議上蔡經多採納疏請行之捷聞蔡經改左侍郎進秩
一級柳珣加宮保諸將帥守臣皆賞賚有差○更定宮僚初夏言選擬

三十七人內崔銑黃佐羅洪先唐順之皆起廢自家人無異議其華察
胡經屠應竣薛僑史際白悅皇甫洵胡守中八人為周琬所劾既而白
悅皇甫洵請補外任胡守中擢僉都御史吏部仍以察等上請上命
察與胡經屠應竣薛僑史際仍守原官別選堪為宮僚者言官又謂南
京吏部侍郎費家給事中呂懷黃易皆夏言私親上亦命家等各守
原官于是言等乃舉江西副使徐階為洗馬兼侍讀考功郎中任翰為
左司直兼檢討文選主事周鈇為右清紀兼侍書復趙時春為編修兼
校書仍以胡守中為副都御史兼詹事府丞起故編修王同祖為司業
兼校書宮僚始定時給事中錢薇上言所選宮僚不宜用此奔兢之徒
亦不欲顯摘其醜上曰既云所選非人又不明言奸佞至此哉令削
籍不叙○右都御史朱裳卒裳性峻直有清操嘉靖初綜覈吏治舉五
人卓行而裳第一歷官三十年人謂有先朝名臣之風○六月丁酉朔

雷震奉先殿時雷擊殿左吻并鼓樓殿 上召大學士夏言顧鼎臣往視時畧已移辰言等尚未入政府 上不悅曰輔臣朕所憑倚恣逸若是何以表率群工命禮部劾之言等請罪 上曰朕每寬言過非為言為左右義重也言乃滋傲惰成性歲不知警何以表率百僚鼎臣亦相效既已知罪姑宥之自後諸司敢肆過蹈非者部院叅奏相黨護者連坐既而 上祭告戒諭群臣同加修省左都御史王廷相因應詔自陳上言人事得而後天道順大臣法而後小臣庶臣觀今日士風臣節知災異所由来昔在先朝盖有賂者猶百金稱多而今累千鉅萬以為常盖有貪者猶霄行畏人而今明目張膽曾不忌大臣貪濁而安處則小臣倣效京官貪濁而無患則外官鼓動干和召災率由斯致臣不能正身格物使弊絕風清乞賜罷黜以儆有位不允○秋七月頒賜御製大狩龍飛錄於文武群臣及各王府○戊寅水火木金四星聚于東井○

遣官賜書禮於汝府等王荅南狩來朝之禮也○瑞昌王府輔國將軍拱柄表進大學頌一章 上留覽以奏牘不謹下禮部奏劾尋宥之○致仕通州同知豐坊奏卿雲雅詩一章詔付史館 ○河南永城知縣劉瑤進瑞麥一莖七穗者二本 上曰麥粒我民允為至寶朕當勉脩敬德以荅帝貺○賜行邊使尚書翟奎總督尚書毛伯溫侍郎樊繼祖銀幣以三臣在邊有捍禦功也翟奎因請於宣府之方城許家庄東井各修築城堡添設官軍守之報可○逮訊襄陽典史王文魁等治罪先是聖駕議南巡文魁同民人栗奎詭列民行為奏疏語多觸犯傳流道路冀得聞上停止而李文政等復用黃帖抄謄傳播東廠旗校緝獲以聞時栗奎已故有旨逮訊文魁等坐妖言惑眾律及二十餘人各治罪有差○以冊立東宮恩賞在京養濟院窮民五千八百五十餘人各米四升○命發清江廠造舡餘銀三萬兩為臨清磚廠燒造雇運之費○

工部侍郎顧璘巡撫湖廣都御史陸杰疏請隆慶殿儀式 上以舊殿
規制已善不必改惟承天府陽春門外并城樓舊制卑隘宜改造高大
壯固○以冊立覃恩廕兵部尚書無右都御史毛伯温子朴戶部侍郎
高公韶子鈺禮部侍郎蔡昂子應炎工部侍郎無右副都御史顧璘孫
履祥通政使許紳姪沐太常卿陸深子楫順天府尹邵錫子淮應天府
尹袁擯孫勿南京光祿卿楊維聰子文祥巡撫山東右副都御史曹蘭
孫文巡撫大同右副都御史史道子直臣巡撫江西右副都御史胡岳
子鍊撫治鄖陽右副都御史王以旂子管巡撫遼東右副都御史劉漳
子思正巡撫河南右副都御史胡纘宗子初巡撫山西右副都御史路
迎子桂巡撫江西右副都御史王暉子誠俱為國子生既而又廕提督
兩廣侍郎蔡經子思恭巡撫甘肅右副都御史牛天麟子宇巡撫湖廣
右副都御史陸杰子光弼巡撫陝西右副都御史任裕子瓊巡撫貴州

右副都御史張鉞子繼芳光祿寺卿趙廷瑞弟廷璋亦俱為國子生○
召起右副都御史熊浹為南京禮部尚書○雲南楚雄廣西臨安三府
地震臨安民有壓死者○日本國王復遣使來貢先是嘉靖二年日本
使臣宗設等入貢比歸擄掠中國吏民以去自此紀不通貢者十有七
年至是復脩貢浙江鎮巡官以聞 上曰夷姓多謫不可輕信巡按御
史督同三司官嚴加譯審果係效順如例起送仍嚴禁所在居民無私
與交通以滋禍亂餘如所擬○顯陵二聖玄宮成○真獻使京山侯崔
元監禮使禮部尚書温仁和各疏報山陵事竣 上悅温旨答之○吏
部右侍郎無學士張邦奇請假送母還鄉 上謂大臣祿養壽母乃自
古治朝盛事所請不允○命臨淮侯李廷竹僉書南京右軍都督府○
賜文武大臣命婦金幣○詔加戶部尚書梁材太子少保材十七年考
尚書六年滿奉旨致仕至是召復原職吏部以例請 上嘉材清操著

聞乃有是命。補鑄嘉靖制錢命兩京工部各監造初南京吏部司務朱希臯疏言開礦濟用不若倣古採銅充賦設官鑄錢又禁其偽以行其真新錢既成貿易轉輸賜予俸給皆於此取之甚便章下戶工二部覆言今天下州縣則壞成賦為籍已定若復括銅充賦未免紛更且兩京俱有寶源局開鑄法未嘗廢可特令補鑄制錢之數仍申嚴盜鑄阻壞之禁詔如議行於是申令行錢地方無論制錢及歷代舊錢無用每好錢七十文准銀一錢低者以二折一有藏蓄私鑄鉛錫小錢者許自首免罪仍依時估給與鉛錫之直不首者捕治如例。詔賜遂平王府奉國將軍安清金幣初安清以聖駕南巡大建醮典為上祈福適有鶴白天而下至是周世孫朝炯以聞。上嘉其精虔賚以金幣。戶科給事中楊上林疏論順天府尹王道中言道中係京師人桑梓故鄉例應迴避而偃然受命非所以遠嫌疑一政體也既而考察自陳詔致仕。

南京禮部尚書霍韜等獻聖功圖時韜典考功郎中鄒守益言皇太子幼未出閣未可以文辭陳說惟目聞正言見正事則可為養正之助乃繪圖為十三事以進。一曰文王為世子問安。二曰視膳。三曰文王世子齒胄。四曰漢桓榮授經。五曰神堯茅茨土階。六曰大禹菲食惡衣。七曰卑宮力洫。八曰周王知稼穡艱難。九曰周室后妃蠶織。十曰宮中隙地。聖祖令種蔬菜。十一曰西苑稼穡。十二曰西苑蠶桑。十三曰商高宗訪道。上覽之曰此冊語多回隱假借訛謗無人臣禮姑宥不罪。遼東達軍作亂總兵馬永勦平之時廣寧衛達軍終伏作亂永以家丁夜不收三百餘人嚴捕斬首四十級生擒二賊無一人脫者初遼東有變上卜將於輔臣李時時謂永有家丁三百餘咸驍勇善騎射至是永果以家丁立功乃進永為左都督。閏七月詔諭朵顏夷人不得授職事時朵顏衛夷人打哈以姪革蘭台等俱得職事而已為花當子乃猶未

得因欲阻貢以脅求都指揮職事語甚不遜薊州巡撫張漢等請調兵備勦上令巡撫明諭不當受職之故彼宜聽受遼東官軍且勿輕調○庚申獻皇帝獻皇后合葬於顯陵新寢既而勲輔大臣以神主升祔廟享大禮告成上言奉慰上曰朕冲昧稔愆累及父母今者送終禮畢孤惟永慕轉覺不堪卿等陳慰具悉忠悃但人子之情未盡莫如朕甚奉天動民恐亦冒昧卿等其悉心匡朕不逮時少詹事孫承恩獻慈孝獻皇后山陵禮成頌一通上留覽○宣城伯衛鐔遂安伯陳璉請有輿上以提督營務勞故特與之○南京禮部侍郎呂柟罷柟因彗見雷震之災上躡自列遂命致仕○召霍韜為太子少保禮部尚書掌詹事府事時韜入京道過揚州遇南京進鮮太監張禧還舟八艘挽卒數百郵傳苦之韜命候吏罷其原閔止用一艘十餘卒乃自揚州至天津通簿錄之總計乾沒二千餘金至京奏聞章下兵部○八月大計京官

國朝令甲每已亥年殿最京官黜陟之皆以二月是年以上南巡吏部奏移八月時南京奏黜者七十人屯田御史錢籍自知見黜乃疏劾考功郎中章袞與大計疏並上上曰錢籍既黜如何仍用御史印法當置理第已削籍姑免流放○詔逮繫太僕卿楊最訊治歿于獄時上諭輔臣曰朕欲命東宮監攝國事重務仍請裁決朕靜攝一二年即可親政如初最聞諭即上疏言聖諭何為至此揆厥所由不過信方士調攝修養耳夫堯舜性之湯武身之非不知修養可以至僊以不易得也不易得所以不學豈謂堯舜之世無僊人堯舜之智不知學仙哉孔子謂老子猶龍龍即仙也孔子非不知老子之為仙不可學也不可學豈易得哉臣聞皇上之諭始則驚而駭繼則惑而悲犬馬之忠誠有如周昌期期不奉詔者皇上端拱清穆恭默思道以純心契天心以孝念格玄穹不邇聲色保復元陽不求仙而自仙不期壽而萬有千歲黃白

之術金丹之藥恐傷元氣本性不可服用也至於監國重事臣不敢及自有大臣主議陛下定裁九重之暇肯一留意庶杞人之憂或可比韋絃一助疏入 上覽之大怒詔逮繫錦衣拷訊久之瘦死獄中○虜入宣府塞西路叅將賈英禦之敗績時虜酋青台吉哈刺台吉那林台吉皆屯牧塞外時時掠宣府至是復入塞英見虜少率衆禦之亂行而前入虜伏虜殺我將士千餘人掠戰馬千匹益深入兩路殺掠人畜萬計總兵官江桓竟不出援事聞奪桓兵柄○九月乙未朔日食三分在未明之前免諸司救護○命兵部尚書毛伯溫督師咸寧侯仇鸞爲總兵官進討安南時伯溫總督宣大軍務乃移鎮廣西徵集兵餉爲出師計鸞受命濱行請帶間住省祭官吳電等十人與俱 上怒令兵部查議以聞兵部因奏鸞等越例妄請鸞亦尋疏引罪 上念鸞方膺重命姑不究令法司逮治電等寅緣希進之罪○復築大同五堡成巡撫大同

副都御史史道修築大同弘賜鎮邊鎮川鎮虜鎮河五堡堡成至今賴焉代人建立三祠以祀道○禮部上聖駕躬詣長陵奉安成祖陵碑儀注辛酉駕發京師駐沙河勅駙馬都尉京山侯崔元刑部尚書周期雍居守壬戌駕至天壽山行宮○冬十月乙丑朔 上躬祭長陵立成祖文皇帝陵碑○皇太子千秋節賜文武百官壽麪○命戶部右侍郎王杲兼僉都御史往河南賑濟時河南災甚巡撫胡績宗奏乞特遣大臣發內帑銀往賑戶部覆請卽委績宗督所在有司發倉庫賑濟不給始以內帑佐之 上曰地方災重民農歿亡數多朕心惻焉其亟推有才識大臣往彼設法賑救毋得視爲故常乃命杲往○鎮守大同總兵官梁震卒震榆林人深沉有機略騎射絕人初爲指揮卽以敢戰知名不十年爲西邊大將每出塞攻虜虜人畏之至是卒賜祭葬贈太保謚武莊○詔賜光祿少卿蔣欽祭葬欽常熟人武宗朝爲南京御史劾奏逆

瑾擅權亂政被逮拷死瑾誅贈今秩後 上允言官請命所在立祠祀之而廕其子院入監至是巡按直隸御史陳蕙復以祭葬請故有是命
○命加大同巡撫史道兵部右侍郎兼都察院左僉都御史先是妖賊楊通等暗結叛軍劉天爵等謀變欲先殺親王鎮撫等官道廉知之乃伏兵先時撲滅黨衆數十即日兇軍逃伍者不可勝數該鎮倖免覆轍之禍既而達賊入犯右衛丁家村又入犯石嶺關等處道調遣兵將對敵斬獲賊級甚多又虜賊大舉入寇道又會同總兵官梁震分道督兵於紙房頭等處斬獲賊級衆沮回至是以修築大同五堡功程敘次總督尚書毛伯溫及行邊使翟奎已故總兵梁震巡按御史皮東山建議督修之功 上嘉道功云伍堡修設已成委益邊防大計史道盡心邊務忠勤可嘉乃進是官仍賜銀幣廕一子入監加鑾伯溫俱太子少保震贈太子太保○詔逮繫新城知縣吳瑗詣京廷杖戍邊尋以亡命

誅之瑗在縣聽斷不審時濼州衛軍餘唐剛惑後妻言訟子鉞不孝瑗收鉞捶之幾死縛至市命屠僧江道朱雲支解之鉞弟亮走訴巡按御史金清檄保定府收瑗置對得唐剛後妻惑妬狀鉞非真不孝者乃疏其事以聞 上曰瑗專殺非罪當抵死乃逮繫至京廷杖一百絕邊世戍後以亡命卒誅之江道朱雲亦各論戍○詔覈句容祖跡時巡撫江西都御史王暉句容人也上言句容朱家巷皇祖故鄉墳址具在乞會官覈實表揚以光聖孝 上然之乃勅南京禮部侍郎崔銑會撫按覈訪既而銑持不可曰興王之基失實為罔事竟寢○十二月太常寺卿穆孔暉卒謚文簡孔暉堂邑人夙有俊才好古文辭行已端雅士論重之 上念講讀勞卹典從厚○詔錄故大學士劉忠孫存恩為中書舍人○ 庚辰日生暈及左右珥白虹亘天○虜入宣府及榆林塞時虜初入宣府深井諸堡詔逮總兵江桓下獄既而復入榆林塞殺守將

宋隆○令武職爭襲謀殺者族姓皆不得承襲時南京和陽衛舍餘李鰲謀襲祖爵殺其兄子百戶王鰲子堂實翼鰲為之南京刑部論戕殺宗親罪死奏請揭黃從之因命武職爭襲官爵謀殺宗支者雖有族姓不許承襲著為令○詔撤行宮 上回鑾後諸道行宮未撤中外流言上復南巡有司爭歛民財備供億霍韜奏請禁之工部請速撤行宮訛傳自息有司不籍口需求 上命亟行之○詔賑河南饑民時撫臣王杲上河南饑狀 上命亟發德州倉米穀賑卹○詔存問工部尚書陳雍時雍年九十有高行知府湯紹思請加禮以示風勸 上嘉雍德壽賜以羊酒令巡按浙江御史及門存問給米併後夫歲以為常

庚子嘉靖十九年

春正月甲午朔○貴妃周氏薨妃出皇長子至是以疾薨 上痛悼之追封為皇貴妃○以太子少保兵部尚書無都察院右都御史行邊使

崔鑾為禮部尚書兼武英殿大學士仍入內閣參贊機務○詔城沙河行官時行宮將成 上勅兵部侍郎樊繼祖營築城池會順天保定二撫臣議畫工役于是巡撫保定都御史劉隅以工直錢穀上請 上命工部酌處之○以刑部自外郎劉汝楠為湖廣提學僉事初江以達主試福建汝楠以險恠得辭首明年會試南宮為主試張孚敬所黜仍戒飭之後第進士歷官自外至是遷湖廣提學僉事御史舒鵬翼論劾汝楠為文離經叛道如白書魔語使任豎學長浮競薄弊將何止仍乞勅下部院查覈天下提學官有如汝楠與近年張鯉江以達者併行斥逐庶文體正而士習可端吏部尚書許讚覆言汝楠鄉貢文字固多奇險會試南宮已就平實姑令督學如仍尚奇險即行糾黜 上從之○巡按順天御史馮彬請設薊保重臣不報彬上言薊州一邊起自居庸延及山海關橫亘五百餘里環拱京畿密邇陵寢為國家要地國初置大

寧都司于嘉峯口外古惠州地復置營州等衛所十餘以控制之又封建親王其間西聯宣府東接遼陽儼然藩屏之重成祖以朶顏大寧福餘三衛靖難有功乃徙大寧都司衛所于保定徙寧府于江西而以其地與之仍官其酋長為都督等官歲令百人入貢厚加賚賞使為藩籬而已已之變乃北向構難成化間嘗遣大臣經畧後復報罷近年以來益為窺伺入貢後期或時為侵掠不可不慮雖有撫臣申飭警備而兼治民事彼此牽合宜專設重臣付以便宜使駐薊州保定以固邊防疏入不報○巡按陝西茶馬御史沈越請節省地畝課茶脚價消姦弊以甦民困從之初漢中府所屬金州西鄉漢陰石泉紫陽五州縣歲辦地畝課茶伍萬餘斤西安漢中臨洮鞏昌平涼鳳翔六府每府編茶夫百名每名徵價貳兩五錢額解漢中府收貯大戶解茶到府領銀自行雇脚運至茶司後漸徵解不完借支他項解茶大戶領銀妄費復科派盤

纏揭借私債負累告擾迄無寧歲越因上言茶運衙門官吏夫役冗濫先經裁革今已五年不期徵解夫銀累有拖欠大戶領價浪費復多茶多人少路遠力疲經年不到有誤易馬而科派揭借年復一年伍州縣貧民何以堪之夫以五萬斤之茶每年公私之費至四千餘兩傷財亦甚况陝西地方控制三邊賦重差繁民貧土瘠小民額辦多不能供所據脚價委應減省因定各路脚價各府原編茶夫價銀通行免編止將累年拖欠并存留各府者徵解支盡候支進之年止行南鄭徽州照前編征其收茶大戶止令赴司驗收以防中途抵換西鳳等府如有盤獲私茶類齊封記各由通運轉解茶司則官無遲誤催督之擾民無重差負累之困課茶易完易馬有資邊方馬政少裨萬一疏入 上嘉其省約為民令行之○巡按雲南御史謝瑜論劾禮部尚書嚴嵩言嵩為蔡喬所劾不自咎責倭辭巧辯謂贊易明堂扈蹕南幸為諸臣所嫉蓋假

此以揚已功激聖怒而箱眾口耳豈自解之本心哉臣在遠方不知臺
諫劾嵩者何指但嵩之可論難以枚數選譯字生通賊無算宗藩陳乞
索賂奏覆至齋詔官役亦索重賄旋日仍求土物且收買童男女充斥
家庭歌舞自娛或待價轉沽豈宗伯大臣所宜為乎疏入報聞○二月
清軍御史姚虞上流民圖言今承天修建陵宮及陽春等門工作匠役
官為召募飢寒及河南饑民皆來就役求食携妻襁子不下萬計而匠
額有限不能容收屯聚饑餓積屍載途其尚存者或鬻子捐妻或剝木
掘草或相向對泣或矯首望天猶可言也及其父不顧子夫不計妻飄
零于陰風積雪之中匍匐於頽垣荒壠之下臣實掩鼻酸心撫膺流涕
有不忍言夫承天陵寢之地二聖安靈之所而流民死亡淒號萬狀二
聖之心必有弗安謹效鄭公繪圖十二以聞乞聖明垂覽從宜賑卹部
議請將郡縣預備倉糧人以三斗諭令回籍從之○罷武舉科時歲例

當開武科鄉試兵部上請 上曰武舉未見得人姑已之兵科給事中
王夢弼因上言取之不廣故習者少自陛下定制三年一試取至五六
十人士皆踴躍思奮一旦報罷恐士解體詔如前旨不許妄議○詔營
興邸 上命修營舊邸宮殿督工太監袁亨預計工直總用四十六萬
有奇移文監督侍郎顧璘轉咨撫臣陸杰杰因上言湖廣連年水旱民
困已極大工重費自非一方所能辦乞行開納事例令天下郡邑凡輸
納者俱赴璘處收貯以備支用章下工部議行之○三月癸巳朔日食
○御史楊瞻樊得仁等疏請以故禮部侍郎薛瑄從祀孔子廟庭不從
時瞻等言瑄國朝大儒宜從祀文廟詔下儒臣議尚書霍韜等十三人
議宜祀庶子童承叙等議宜緩檢討郭希顏等以瑄無著述功議不必
祀給事中丁鴻等請從眾議之多者 上曰薛瑄能自振起誠可嘉尚
但公論久而後定宜俟將來乃從童承叙等議○詔營仁壽宮先是命

修慈慶宮景陽宮及壽宮離宮諸役繁興費已不貲俱未告完至是又命修西苑仁壽宮給事中朱憲御史金聚等各上言前舉慈慶等工動以百萬計而此宮之役料直人力當復倍之倘事在得已乞為暫輟則寬一分小民受賜一分上曰朝廷一小舉動輒行瀆擾姑置不問○虜入榆林又入宣府塞虜入寇榆林破清平堡入米脂殺掠人畜萬計焚芻糧數萬長驅而出總兵周尚文駐兵青秋原虜退以捷告虜又入宣府破北路馬營諸堡掠神鎗銃砲千計芻粟牛羊萬計往時多掠婦女近年遇婦女輒殺不掠此時又掠一婦○詔湖廣置荆西道設守巡官時湖廣江華縣苗寇廖道堅等五百餘人羅田縣強寇張友忠等二百餘人竹谿縣竿子寇一百五十餘人各劫掠鄉鎮拒殺巡捕主簿及巡檢等官上下命督過撫臣陸杰因請分武昌道之德安府荆南道之承天府置荆西道設分守臣官駐承天分巡官駐沔陽州以護陵寢

○詔增顯陵陵戶二十名其裒恩殿每年供用照隆慶殿一體俱辦從守備太監傅霖請也工部右侍郎顧璘因上言修顯陵陵宮殿計銀四十六萬兩有奇請派南直隸浙江江西福建兩淮兩浙鹽司協濟又言承天大工並興軍夫匠役日食米四百石無以荒旱不給宜將借用承天用餘南糧先行支放及漢陽等府所運南糧八萬五百餘石悉留接濟詔俱從之○詔復錦衣衛百戶費洪職洪先以兵部考察去任疏言臣嘗三獻微言奏補九嬪以廣聖嗣今東宮已定覃恩天下臣獨廢黜不與乞復原官詔許之○命御史楊宜提調南直隸學校○以水災詔留江西南昌等府縣九江永新等衛所折銀糴穀以恤之○掌錦衣衛都督同知陳寅言今年當軍政考選之期而兵部以錦衣衛類題錦衣係近侍直差之臣須歷練閑熟卒難更易乞照嘉靖三年例免考許之○以旱災免湖廣武昌黃州鄖陽承天各府州縣并各衛所及保靖宣

慰司存留糧三分之一。○湖廣江華縣苗寇廖道堅羅田竹溪縣盜郭仲才張友忠等作亂殺主簿張文英巡檢許昂事聞詔責總兵官譚綸巡撫陸杰兵備戴時宗等俱令戴罪剿賊未幾報賊俱捕得誅之。○侍講學士閒任廖道南進文華大訓箴解詔留覽。○調御史毛愷外補時陞洗馬鄒守益太常少卿無侍讀學士掌南院事愷因言守益名儒宿學宜留侍青宮不當投之間散。上以愷阻議成命干預予奪調寧國推官。○詔令兩京公侯伯子弟凡未任者送監讀書國子司業王同祖言世祿之家鮮克由禮如教之不豫則統袴之子何望干城請令兩京公侯伯子弟未任者悉送監讀書如嘉靖八年例自今以往歲以二月舉行學有可觀則奏聞叙廕不率教者並聽糾治兵部覆請。上從之。已乃詔襄城伯李應臣興安伯徐夢暘惠安伯張鏞崇信伯費偉清平伯吳家彥俱赴監讀書觀禮。○禮官請以四月朔日朝講詔待秋以請。

○乙巳京師風霾時黃霧四塞俄紫赤色忽暴風從西北起勢如崩崖文德坊及西長安街坊各城旄旗柱俱折夜分乃息。上曰風霾之變上天示戒本朕自致群工百職亦宜警省災變有數殆真可逃朕觀此異凡三見矣占謂主兵喪火西北邊防不可不慎兵部其會官集議以聞于是本兵張瓚等會議上邊事。上曰國家安危重寄在西北邊邇者虜犯我疆邊人荼毒朕甚憫之召災致異厥有所自且兵馬芻糧歲煩調度而將官撫官咸出遴選曾不聞有紆朕憂者顧累以兵食不足為辭此無他不能輸忠畏法耳自今武臣有失律挫威文臣有貪冒顯著者聽科道官糾劾其諸邊有不便者總督撫按奏聞毋隱既而御史包節上言頃因風變上厯聖憂首以邊防下令集議第職掌所在忌避居多汎濫扶踈要非根極不足以稱塞德意即今災異叠見邊事可虞而以貪鄙之張瓚坐筭之若之何弭患于未形因列瓚賣官贊爵諸事

請速罷瓚別用忠良不報瓚疑都御史王廷相嗾之乃上疏力辯且訐廷相與羽流唐珠珊講求丹鉛房術非正人君子所為廷相亦疏劾瓚貪婪罔法行道其咄包節論列何異于臣唐珠珊老年黥髮縉紳共推瓚與交好嘗稱其預知遷除乃以罪臣是同俗而笑僕也 上曰二臣皆朕所簡用各盡心乃職勿得深辯時給事中張堯年復論瓚世居京師親屬故舊環布市井瓚居本兵又踰七載人情習熟請託日多既屢經論列宜量改用以全始終亦不報○夏四月雜谷羗僧入貢初羗戎入貢例自嘉峪關入至是雜谷安撫司刺麻僧都綱定日藏等一十五人僧衆賈思已等一千二百餘人入四川求貢都指揮使司為送日藏等十五人至京入貢珊瑚氈氍諸物餘僧留塞上乃下禮部議賞 上曰各僧姑賞遣還所司違例起送查覈以聞○沙寇叛掠漕舟命都督湯慶討之江陰縣大盜黃良秦璠聚衆馬駝沙為寇時丹陽道堙漕舟

不通乃自奔牛鎮北入于孟賚達大江良璠率盜舟數十溯江上游遇漕舟出竄劫舟粟七艘殺運卒數百人又劫商舶五十餘殺溺商族數十人府衛官督兵追捕乃拒殺官兵執捕盜官一人縛檣竿射殺之遠邇震動南京給事中楊雷乃劾鎮江知府張珪丹陽知縣周寧不濬漕渠致運舟艱險遇寇乞置於理 上曰江寇猖獗守土巡江等官俱難辭責乃奪操江都御史王學夔巡江御史胡賓俸張珪周寧等俱巡按御史收問乃設總兵官湯慶駐師鎮江勦之○詔立烈婦胡氏祠賜名哀烈江西南城縣民李華隨父適遠方其妻胡氏名全姑與姑易氏獨居姑縱淫日與鄰人徐璉等通胡貞白自誓又不顯言姑惡時時切諫姑百計凌虐逼胡與同汚面滅口胡不從姑與璉謀夜猝胡以土囊掩殺之事聞命正璉及姑罪仍詔為胡氏立祠名哀烈賜祭一壇○命發馬價修築宣府邊防巡撫宣府都御史楚書上言宣府一鎮坍塌險邊

垣計二萬五千餘丈挑鑿窟坑一千三百餘所移補墩臺一百二處乞發錢穀營修 上命發馬價三萬畀之○冀州棗強縣天鼓鳴夜星隕為石凡四○五月詔戒諭巡撫陝西都御史賈啟及總兵官周尚文時啟與尚文因事構隙久不相能總制三邊兵部尚書劉天和上言即今大虜十餘萬駐牧河套窺伺榆林而巡撫總兵兩不相協何以應敵乞降勅切責或改秩別用 上勅令協恭守禦違者劾治○禮部尚書李浩卒謚莊簡浩曲沃人器宇魁梧議論英發剛明不撓為時所重○詔建雷壇時工部尚書溫仁和等上言近年大工浸廣為費不貲內自慈寧宮奉先殿景陽宮神厨神庫慈慶宮三殿皇穹宇崇穹壇謹息殿西苑仁壽宮麗譙樓外自諸陵壽宮離宮六聖及景皇帝碑亭諸王諸妃各坐域計用過白金六百二十四萬有奇夫歲入無幾而尚可支吾者以往時節慎庫猶有存積且開納初行應之者衆耳邇來帑藏已竭工

費無紀顯陵之役坐派數省而承天工費百七十萬有奇乞少緩以畢前工 上命計部悉心區畫○詔給還大學士夏言進繳御札四百三道銀記一刻手勅一道○六月湖廣清軍御史姚虞疏請置勾軍簿冊從之先是御史包節題將各衛所應勾軍丁俱置冊印藏一遇清勾將勾單及原冊送清軍御史查覈無弊方用印信清勾至是虞復請申明此法言各處清軍御史例不常設衛所官旗伍匹宿弊以存作缺橫行勾擾乞勅巡按御史一體查理如無清軍御史即送按巡查覈未為定規庶妄勾可息民生不擾部議從之○戶部尚書梁材罷時翊國公郭勛請將缺軍糧銀以濟工費材以法裁之勛遂劾材違抗罷之○秋七月詔授方士段朝用紫府宣忠高士朝用以燒煉術于翊國公郭勛親以進用勛試其術驗遂以所化銀製器百餘進 上大悅時大工煩興財用告訕朝用復獻銀萬兩助雷壇工費 上以為忠愛故錫授此號

後術不驗或謂先所化銀為以幻術即盜勛藏云○詔飭陝西邊防御史沈越上言比者奉命巡按洮河西寧茶馬出金城關登馬站峯沿歷邊境賞番閱武見邊防懈弛不能不重皇上西顧之憂夫從古夷狄為中國患惟北虜回夷西番而已陝西皆與之鄰三面受敵故預防入寇則邊垣宜修預防征戰則士卒宜練預防兵餉則儲蓄宜備預防又守則屯田宜重而固邦本則在邊民之郵修治法則在邊臣之擇尤今日之要務也疏入 上詔陝西撫按等官嚴飭邊防毋得仍前廢弛○詔增湖廣解額原額科八十人今增至九十人○刑部尚書聶賢卒謚榮乘賢長壽人持心清苦始終不變人服其操○御史魏謙吉請黜貪酷之吏從之謙吉言畿輔山東諸郡災傷頻仍科歛繁重閭閻小民朝不謀夕甚且為盜臣切隱憂莫得其計惟在盡黜貪酷別選賢良但往年考察多存寬恕即貪酷顯著亦曲為庇留或止從量調朝廷名為宥過

之仁小民實切剝膚之害乞勅部院嚴加考覈盡行罷黜庶民困日甦盜賊自息 上嘉其有憂民實意詔部院亟行之○虜入宣府塞總兵官白爵雲冒敗之巡撫宣府僉都御史楚書奏言虜以七百餘南下勢若犯東臣意其必西果擁數萬騎入萬全右衛總兵白爵與戰於宣平敗之其別入者副總兵雲冒敗之爵又追奪虜所鹵獲甚衆又大戰于北壯虜乃涉桑乾河半渡值兩官軍急擊又大敗之計斬首六百級獲馬六十四疋兵部言宣府自都勦失事以來日以不振數十年無此捷上嘉其功詔進書又副都御史爵都督同知賞賚諸將士銀幣有差○八月巡撫大同都御史史道請給王府祿糧言本省歷年所逋代府潞城等王府祿糧共銀二十三萬餘兩請借該司豐贍等庫七萬兩先行放給仍行巡按御史嚴督所司催解補之報可○詔發太倉銀二萬兩併關中淮浙運司存積鹽十五萬引於大同鎮又發太倉銀二萬兩於

宣府以備馬價支用○詔賜鎮守雲南總兵官黔國公沐朝輔制勅輔
初襲封時年尚少勅一應地方事務暫令巡撫處分至是都御史汪文
盛言朝輔稍長讀書習禮有祖父風請改勅諭同臣等議事 上從之

○虜犯山西巡撫山西都御史陳講告急上言八月六日達賊由井坪
至朔州城七日分三路由井子窰青屹峇侵至陽方邊接連狗兒澗水
口等處殺官軍掠人畜又入水口佛老觀灰泉梁温等處深入省城西
南十日與嵐交城平虜與汾州文水清源十數州縣封壤連接一望平
原民皆村居曾無堡塞比之邊城葛萬不侔且各賊又遭剽劔延住腹
裏數日不出人心驚惶禍變莫測後報聲息尤爲可駭我兵進退不滿
八千大同援兵雖至大約一千五百遣人督戰觀望不前兵勢至此後
將何支山西地連畿輔密邇京師又與河南諸省止隔一山若不早振
舉必成大患乞下廷臣集議更新絃轍兵部尚書張瓚不以爲然曰虜

今且退何事張皇○虜入安邊定邊塞總制尚書劉天和帥師破之詔
加天和太子太保加大學士夏言少師翟鑾少保兵部尚書張瓚少保
將帥以下各陞賞有差初謀報虜將入寇天和集諸將誓之矢劔曰不
用命者以狗旣而守陴者酒酒不戒虜登即入天和聞變率精兵九千
夜馳八十里駐花馬池時虜已深入大掠固原諸處撫按羽書沓至天
和乃召醉帥至詰得其狀立斬之三軍股栗遂帥衆躡虜分檄延綏寧
夏固靖兵合擊之會天大雷雨虜弓膠解馬斃斃淖中不能去死者相
屬各鎮兵悉至天和密令延綏總兵官周尚文帥師擣其左寧夏任傑
帥師拄其右固靖魏時擊其鋒天和以大兵尾其後強弩火礮四合奮
擊虜遂大敗走逐北數十百里斬虜首五百驍卒張奴兒殺吉囊子號
小十王者諸酋大哭遁去天和乃以捷聞 上行告廟飲至禮下壺書
褒獎天和即軍中策加太子太保任一子錦衣正千戶陞賞三鎮文武

吏士千餘人授張奴兒世指揮食事內閣夏言翟鑾以謀謨帷幄加言少師鑾少保本兵張瓚以曲盡方畧坐收全功加少保任一子錦衣副千戶巡按劉光祖呂光洵亦加陞賞巡按以邊功叙錄自此始○以秉一真人陶典真子世同為太常寺丞孫良輔及壻吳濬俱食博士俸○九月乙卯熒惑入南斗犯南斗杓第二星數日乃去○冬十月戶部尚書梁材卒材大城人敷歷中外清節著聞司國計者前後十年時工作煩興邊費無藝材謹守管鑰出入有度一切濫請妄費悉靳不與而振起上風屹然自守砥柱中流無愧古人後追謚端肅○大學士顧鼎臣卒贈太保謚文康鼎臣崑山人性樂易無畦町自入講筵即受知于上及卒遺表勸 上親賢愛民保護聖躬 上覽之悲悼輟朝一日○禮部尚書霍韜卒韜南海人質直好古行誼高潔卒謚文敏○十一月壬寅金星晝見○以楊守禮為右都御史總督三邊軍務時給事中馮

亮上言三邊大捷之後虜方蓄憤積怨期于一逞總督重臣倍宜簡任 上是其言令廷臣推薦咸薦守禮故有是命○安南莫登庸來降初毛伯温至廣西徵集兩廣福建湖廣狼土官兵并檄雲南守臣別集兵候師期又檄諸司於臨邊諸郡縣儲積糧餉議分正兵為三哨廣西憑祥州為中哨兵四萬人叅政翁萬達副總兵張經監督之龍州羅田峒為左哨兵一萬四千人副使鄭宗古叅將李榮監督之思明府思陵州為右哨兵一萬四千人副使許路都指揮白法監督之分奇兵為二哨歸順州為一哨兵一萬四千人叅政張岳都指揮張輓監督之廣東欽州為一哨兵一萬四千人副使陳嘉謀叅將高誼監督之又烏雷山等處為海哨兵一萬四千人副使涂捷都指揮武鸞監督之中軍則都指揮董廷玉等率五百人為親兵共領兵一十二萬餘人又議雲南別集之兵於蓮花灘分三哨哨各兵二萬一千餘人中哨以副使鮑象賢都

指揮王紹等監督而督餉則布政使胡宗明左哨以副使鄭騶都指揮方策監督而督餉則右叅政朱方右哨以副使張綱都指揮馮立等監督而督餉則右叅政程旦皆黔國公沐朝輔都御史汪文盛主之經畧既定兵衆漸集乃馳檄諭安南父老士民諭以興滅繼絕之義大懸賞格言討罪止於莫登庸父子有能擒斬莫登庸莫方瀛者賞銀二萬奏加顯秩有願以府州縣歸附者即以府州縣與之又諭令莫登庸父子果能束身歸罪盡籍其土地人民納款聽命亦待以不死伯溫等駐師近邊尅日進兵登庸聞之懼遣使詣軍門陳乞願出境降躬聽處分詞頗卑切伯溫等承制許之約以十九年十一月初三日來降守臣于鎮南關近地修設幕府將臺以待時登庸子方瀛已死乃留孫福海于其國至日登庸與其姪莫文明并酋目阮如桂等四十餘人入關各尺組繫頸詣所設關庭徒跣匍伏稽首跪上降表復詣軍門匍伏再拜籍國

中土地軍民職官悉聽處分所侵四峒願以內屬仍請給頒正朔護守舊賜印章以候更定於是伯溫等宣諭朝廷威德暫令歸國候命是役也萬達岳始終經畫宣力為最○慈慶宮本恩殿成○十二月戊午太白經天○虜又入大同塞○南京奉先殿成時修葺訖工○詔奪贊善羅洪先司諫唐順之校書趙時春官罷為民洪先等各上疏言來歲元日朝賀禮成請皇太子出御文華殿受文武百官朝賀禮部尚書嚴嵩覆言繆妄上曰朕方疾後未全平復遂欲儲貳臨朝是以君父為不能起者羅洪先等狂悖浮躁姑從寬令俱黜為民○吏部尚書許瓚進嬰童百問上令禮部校刻之○大理寺左寺正王文光條上恤刑事宜納之先是文光為御史以爭南京守備掌兵無隱憂忤都御史調大理一切持平屢奏讞稱旨至是疏恤刑詔下所司○崇王載境請父恭王墓表上不許時王為其父恭王請墓表禮部言韓府襄陵莊穆王

卒憲宗嘗允其子範址請令詞臣撰銘刻石崇王曾祖比皆嘗賜墓表請如王奏 上曰宗室薨逝給墳誌此祖宗典制安得有賜表事襄陵王立石已非例崇兩王表墓皆先朝誤恩後有王家乞請禮部宜考累朝體例議覆

辛丑嘉靖二十年

春正月戊子朔雪先是歷冬無雪至是始雪大學士夏言等各撰頌以獻○詔治覲臣請謁時都給事中李文進言諸臣覲畢徧事請謁輒以書幣問遺權貴非所以風四方崇廉耻矧明禁在邇豈以先後異致及今不止後將謂明禁為虛文益滋奸弊乞下所司緝捕庶知所警 上詔亟行之○刑部尚書楊志學卒謚康惠志學長沙人在寧夏柳門却虜并築花馬池垣墻屢立邊功○刑部左侍郎陳璋卒璋樂清人始忤逆瑾又諫南巡廷杖以忠直自負海內慕之○西海虜酋遣人叩塞納

款時甘肅巡撫都御史陳卿言西海虜酋卜兒孩遣人獻金牌馬匹叩塞納款事下兵部尚書張璣等言卜兒孩據西海二十餘年實為甘肅腹心之害若果輸誠則莊浪西寧諸處得耕牧休養屯田堡寨得乘閒脩舉河西孤危之勢可轉為安但虜情叵測今止獻金牌馬匹未有如往歲來遣子入侍酋長入覲之事鎮巡官亦未明言何以待之請命總督尚書楊守禮同本鎮官偵察情實併陳制禦之策奏請裁決或甘言諛詞緩我邊備亦速奏處仍令巡茶御史覈金牌所自以聞 上從部議○巡撫大同兵部右侍郎史道 病乞休時給事中聶靜言道培剋曹已備禦無策徒妄意內陟冀脫禍幾乞賜罷黜疏下道乃歷叙年勞併乞以奏內事情覈勘且曰人臣任事有險夷有難易有勞逸譬之擔負者二人共一人之負則逸一人盡一人之負則勞一人併二人之負則困而莫勝一人無十人之負則困而必至于斃若夫袖手空言者焉

知負者之苦今外臣之難惟巡撫最巡撫之難諸邊最諸邊巡撫之難大同最臣以淺昧承乏重寄真猶操萬斛之舟於洪濤巨浪中其所仗籍者陛下之威靈耳使坐享安閒者不憫其持危濟險之難與夫努力支撐之苦又從而下石以挫敗其氣臣之四体何以展布計乞如臣請而已 上念其年勞優詔留之○二月巡按陝西御史張光祖疏薦致仕南京禮部右侍郎呂柟言柟安貧力學忠信篤敬雖年踰六十精力尚強乞不循常格即賜擢用疏下所司○命承天督工尚書顧璘修興都志時顯陵寶城及舊邸宮殿俱工成進璘工部尚書承天知府吳惶請纂修承天府志禮部尚書嚴嵩言禹貢並叙九州而尊統于帝都今日承天宜總為興都一志但總裁分纂貴在得人今督工尚書顧璘文學素著足任筆削宜令兼督有司聘委文學官儒分纂璘為總理草成進覽下內閣者詳恭請裁定後刊布四方詔如議○會試天下貢士命

掌詹事府事禮部尚書溫仁和侍讀學士張袞為考試官取林樹聲等三百人○詔逮繫御史楊爵下錦衣獄爵上言臣病居田野九年於茲適蒙聖恩任以耳目之責每思國事日非君恩未報痛心流涕方今之勢如人病極內而腹心外而百骸無不受病臣請舉目前所見足以失人心而致危亂以貽而憂者為陛下告天下之患真大於以危為安實則可憂而以為大可慮也往歲夏秋不用歷冬無雪至元旦始雪即止大學士夏言等輒謂雲瑞稱賀欺天罔人不已甚乎翊國公郭勛大惡大蠹中外知之而使肆毒于政致群狡趨附善類退處為國家禍不日深乎此任用匪人足以失人心而致危亂者一也君人者奉天安民使之各得其所今四方饑饉相仍小民委命溝壑而土木之功十年不止又連委部臣遠建雷增股民膏血民何以堪此興作不已足以失人心而致危亂者二也唐虞三代君臣每以勤敬之道交相儆戒陛下即位

之初嘗頒示敬一箴于天下數年以來朝儀間缺經筵不御參辭不得一覩聖容敷奏不得一聆天語人心日怠中外渙然此朝講不親足以失人心而致危亂者三也方士執左道以惑衆聖王所必誅者乃今異言異服列于禁廷金紫赤綬遍于羽流保傅之職坐而論道者加之迂怪之徒聖德國體所損不小陛下以上天元子若遠宗帝道近守祖法則和氣致祥罔有天災山川鬼神亦莫不寧安用此耶此信用方術足以夫人心而致危亂者四也古人有言君聖則臣直若震之以天威加之以危禍如往年楊最言出而身即死近者羅洪先等以言罷斥臣恐忠藎杜口則諂諛交進民情吏弊何由上聞此沮抑言路足以失人心而致危亂者五也此數者關天下治亂係國家安危貽聖心之憂誠不容已願皇上念祖宗創業未之艱難思今日守成之不易察臣愚忠賜之施行疏入 上覽之怒甚命逮送鎮撫司長繫之時中外諱言爵論出

人皆稱其謹直云○二月追賜刑部尚書潘蕃祭葬蕃崇德人先在兩廣以忤逆瑾與劉大夏俱謫戍瑾誅宥還至是巡按浙江御史傅鳳翔上言蕃平生大節與大夏等卹典不宜獨缺故追賜之○詔錄用舊臣初臺諫官交章薦用舊臣吏部議請如所奏 上命李廷相唐龍屠僑張景華顧似王道鄭本公王崇慶等叙用惟呂柟何瑋不叙○廷試賜沈坤潘晟林一鳳等進士及第出身有差○吏部尚書許讚乞罷不許時給事中徐燝劾奏吏部主事李棟貪鄙不職 上詰責讚令覈實以對瓚疏陳因求罷 上慰留之○夏四月詔降安南國為安南都統使司以莫登庸為都統使先是登庸奉表乞降諭令歸國候命伯溫乃與守臣聯疏上言自古南夷創亂類皆鴛鴦詛詐憑恃險阻勢強則鴟張以梗化力屈則鼠竄以全身中間亦有稍識利害通款求附止於遣使奉表致其方物如尉佗黎桓者以漢文帝宋太宗之盛未有褫衣自縛

扣求哀切如登庸今日者所據登庸乞要內屬稱藩歲領大統曆日補足節年貢物似亦可宥如以登庸有罪投降未宜輕授爵土或可別與都護總管名色如漢唐故事使撫安南夷衆其黎寧雖自稱黎利子孫查勘踪跡委實難明卽惟僚一向潛任該國近據雲南開報會審夷人鄭垣口稱漆馬江峒雖有黎寧而來歷宗派不可得詳所列事情年貌又與惟僚原報互異俱難憑據當再查勘果實聽令仍于漆馬江居住管束見有地方或量與職事徑屬雲南鄭惟僚亦宜安插廣東量給田宅不致失所因將出師受降次第布為八圖曰天威丕振曰交夷組繫曰釋縛乞降曰稽首祈恩曰夷酋咸服曰耆士陳詞曰夷民感德并遣官伴送莫文明等至京事再下廷議俱請如伯溫言上曰莫登庸既面縛軍明納土請罪察其款表與國人代陳情有可原茲為交人永圖革去王號勿得稱國庶免亂臣接迹云乃降安南國為安

南都統司以登庸為都統使官從二品子孫世襲別給銀印舊所僭擬制度削去改正海陽山南等十三路各設宣撫司正佐官職襲替黜陟俱聽登庸統理通隸廣西藩司每歲給與大統曆以奉正朔仍令三歲一貢其漸凜古森了葛金勒四峒侵地還屬欽州國中錢穀甲兵之數不必奏報其黎寧仍令守臣勘訪果係黎氏之後授與所據四府境土以承宗祀若非子孫則已莫文明諸夷使及所遣伴送之人各加賞賚制下登庸已死伯溫等復上疏請以制命授其孫福海從之其後福海不能緩輯夷衆復為黎寧所逐竄居廣東境內黎氏復據其地朝廷亦置不問○九廟災布詔天下時久暘不雨是日初昏風雨驟至大雷電火起仁廟須臾燬主忽延成廟主亦燬遂及太廟昭穆群廟一時俱燼惟獻廟獨存上奉列聖主于景神殿遣大臣詣長陵獻陵告題成祖仁宗各帝后主亦奉安景神殿乃下詔曰朕奉天位思報祖德先正太

祖南向之尊備建九廟之制加薦尊謚用罄追崇賴二三大臣協恭力
贊非朕變更成典實本信遵古道自謂少盡報本之情詎意有今日之
變也朕一聞奏報若墜深淵欲赴火中思無濟事謹力疾奉慰祖宗于
景神殿奏謝上帝神祇告于大社稷遣官徧祭百神書報宗藩詔示天
下臣庶使知一人之重罪致延九廟之御棲揆厥咎原無可容已爰將
寬恤之文預示圖復之力布詔天下咸使聞知都御史胡守中言非常
災變痛切心骨恨不能赴火撲滅所幸獻廟獨存餘可次第光復而都
給事中胡汝霖御史李乘雲因劾大臣坐視火災不速救護 上以汝
霖乘雲挾私妄劾命逮繫考訊獄具謫補外○詔停工作禮部以非常
火災上䟽奉慰 上命一切工役俱輟惟諸殿修營如故○吏部尚書
許讚罷時御史党承賜上言嚴交修以答天戒乞勅兩京文武大臣及
四品以上官各自投劾讚乃引罪乞罷許之給事中戚賢等因䟽上審

進退以回天變言郭勛張瓚樊繼祖李廷相胡守中李開先胡經夏浚
戴儒王廷相王同祖曾經大計罷斥不宜夤緣復進而聞淵熊浹劉天
和呂柟魏校程啟充程文德徐樾王畿魏良弼葉洪馬明衡王臣等雖
以計黜亦宜引戴儒王同祖例錄用則進以天下退以天下善善惡惡
之心協而天心克享天變可消 上曰宗廟災變朕方祇懼戚賢等肆
意妄言顛倒是非如王畿詐偽小人亦擅引薦懷奸植黨一至于斯其
從實覈䟽以聞賢等懼因輸罪乞恩原之○給事中李鳳來等䟽陳時
政納之先是御史党承賜請勅所司各條時政缺失上請裁擇 上曰
今茲災變朕心震驚宜痛加修省以實事天所司條上務切民瘼國體
毋得為彌文應故事于是鳳來奏言六事曰執治體明治功正紀綱慎
刑獄禁暴飲重水利而張瀚亦言六事曰抑奔競重恩典惜人材舉廢
遺公舉刺懲貪墨䟽入 上皆採納○畿內旱蝗議發內帑金賑之○

詔濬運河命兵部右侍郎王以旂督治之時運河淺阻湖廣叅議方遠
宜請開海運 上曰運河一時淺阻已命官往治海運不得妄議既而
漕運都御史周金言運船淺阻徐臨德天津水次舊有廢倉乞速議脩
補以圖寄囤部議此國初轉搬之法故於水次置倉後因漕河已定直
達京師今倡此議恐運軍懈怠而河工亦視以緩不可許給事中郭釐
又言河道既塞事變所伏不如允寄囤為便 上謂宜視河流通塞以
為緩急不可執一因令遣官會漕運官協心經理以濟國儲○詔奪南
京國子祭酒鄒守益官為民守益因災投劾言先王克謹天戒人臣克
有常憲凡厥臣工休戚一體其能者宜洗心盡瘁共濟艱難而不能者
宜引咎求退毋竊祿位糜民脂膏大學士夏言謂言辭乖刺擬旨削籍
上從之○禮部右侍郎崔銑卒贈尚書謚文敏銑安陽人宏才博學
好古能文素履矜然出處無玷士論服之○詔雲南巡撫收繫前僉事

錢世賢論戍邊初世賢雲南人為福建僉事以贓著清軍御史包節劾
罷之及節巡按雲南行部至郡世賢率僕從突擁遮道共詬辱之節上
其事 上命雲南巡撫劉渠收繫世賢等訊治卒論戍邊○六月召巡
撫大同兵部左侍郎史道而部管事以龍大有代之○叅贊軍務太子
少保兵部尚書兼都察院右都御史毛伯溫班師論平安南功行賞有
差時伯溫奉詔班師因疏陳諸臣功績上言臣與咸寧侯仇鸞奉命勘
處安南而莫登庸父子悔罪乞降皆我皇上大德格天至誠動物以不
殺為武以萬全取勝是以一怒而懾遠夷薄伐而屈群醜也勲輔大臣
叅贊密勿禮兵二部廣集衆思而一時從事之臣亦皆仰承廟筭俯竭
愚忠如蒙皇上軫念微勞下部酌議將左侍郎蔡經等叅政翁萬達等
指揮王良輔等均賜優錄其餘分別等第俾沾恩賚誠鼓舞人心風厲
庶職足為明作趨事者之勸如臣碌碌因人成事儻蒙矜宥不加譴責

實愚臣莫大之幸 上詔加伯溫太子太保仇鸞柳珣沐朝輔等及諸
偏裨各擢賞有差○刑部尚書錢如京罷時給事中吳從義論劾如京
貧污敗著 上命錦衣收如京廝後通賂者嚴加拷訊不得其狀 上
令如京致仕○秋七月火毬隕時有火毬大如斗落于左軍都督府中
門左久之乃滅○御史葉經疏劾禮部尚書嚴嵩奸貪不聽時晉府交
城王絕輔國將軍表相謀襲王爵遣校尉任得貴至京以黃金千兩白
金二千兩賂嵩受之復以白金三百兩賂儀制司令史涂旭及王府科
胥人黃瑾姚忠嵩為題覆表相宜襲交城王已得旨會東廠邏卒緝知
得貴行賂執以奏聞下法司鞠實胥史旭瑾忠各戍邊又秦府永壽王
庶子惟熈與嫡孫懷熿爭立以三千金賂嵩亦受之為覆乞王妃遣人
擊登聞鼓奏訴經因劾嵩賍跡暴著瀆亂國經 上曰表相惟熿應否
釀爵行所司勘覈以聞嚴嵩安心供事勿以人言介意○華州同州地

震聲如雷○掌錦衣衛事右都督陳寅進所編皇考聖母御製事蹟及
上龍飛禮儀詔留覽寅潛邸危從臣也○虜酋俺答遣使求貢時俺答
阿不孩遣使石天爵肯切款大同陽和塞求貢言其父認阿郎在先朝
嘗入貢蒙賞賚且許市易漢達兩利近以貢道不通每歲入掠因人畜
多灾疾卜之神言入貢吉天爵原中國人掠居虜中者肯切係真夷遣
之同來果許貢當趣令一人歸報伊郎約束其下令邊民墾田塞中夷
衆牧馬塞外永不相犯否則徙帳北鄙而縱精騎南掠巡撫大同都御
史史道疏聞其事因言虜自弘治後不入貢且四十年而我邊歲苦侵
暴今果誠心歸款其為中國利殆不可言第虜勢方熾戎心叵測防禦
機宜臣等未敢少懈乞亟下廷臣集議所以待之者詔兵部集議以聞
虜待命邊外屢向墩哨卒訶進止一日邀守墩百戶李寶下墩以虜酒
席地飲之載以馬擁入俺酋營與之歡宴虜衆有執掠哨卒劫其衣糧

者俺酋聞而痛懲之遣夷使送哨卒衣糧還巡按御史譚學復以聞因請速定大計准貢則後虞當防不准則近害立至且請多發兵糧遣知兵大臣趨臨調度相機緩勦兵部議覆從之○詔以醫婦李氏侍皇妣后妃及保護皇子効勞日久官其夫王銘錦衣千戶世襲○巡按浙江御史高時疏論鹽課言台州府長寧黃巖杜瀆三鹽場引目額數一票為一引每票鹽三百斤每百斤納銀一錢商人無利多不樂從宜如舊議立中津橋稅每鹽百斤納銀三分庶民甯皆便而國課有益戶部覆議從之○掌太常寺禮部右侍郎金贊仁以三載績滿請廢其徒協律郎陳自暹科臣言廢未有及異姓者禮部覆議量加自暹一職詔與添註典簿不為例○隆慶州妖賊張雄等誘眾作亂巡撫都御史楚書督所部討平之賜書及參議劉珂等銀幣有差○侍講學士聞佳廖道南進所撰顯親達孝頌及清北八箴平南九歌疏入報聞○朵顏酋革蘭

台請益貢使初兀良哈諸部朵顏為大朵顏諸種花當最貴花當長子革列孛羅早死其弟把兒孫驍勇嘗入寇把兒孫死諸眾皆附其革列孛羅子革蘭台革蘭台嘗結北虜欲併力侵邊至是又挾北虜求添貢欲得與福餘大寧每衛各三百人不許復請衛二百人又不許時時出沒塞下輒云結小王子旦夕大舉入塞會俺荅吉囊自大同深入太原乃許補前貢失期者衛各二百人○八月諭免賀萬壽節時禮部以萬壽聖節習儀請上曰宗廟被災朕方待罪生辰小節其令罷賀○兵科給事中蘇應旻請改任魯銑巡撫大同不從應旻言巡撫之設腹裏易而邊方難山東易而大同難大同懸塞外邊防尤重而龍大有素宦江南未諳邊事若魯銑則熟於故事練於邊情陛下用之而頗有效者也任以山東實違其用乞改銑大同上謂已有成命不允所請因令今後用人務審其才各邊巡撫毋得輕推○昭聖皇太后崩上尊謚曰

孝康靖肅莊慈哲懿翊天贊聖敬皇后○命左副都御史胡守中為兵部右侍郎兼原官總督薊州軍務時給事中馮亮御史王繼宗張光祖言三衛不庭北虜猖獗京師百里之外即為賊巢宜遣大臣總督薊州軍務兼理糧儲增設遊擊於密雲往來喜峯口潮河川古北口黃花鎮諸處專備應援仍發內帑銀以備主客兵馬支用 上納其言兵部議遣大臣以張漢陳經名上請 上不許特命守中給符勅以往○召起總兵周尚文時大學士翟鑾等條上禦虜六事曰護衛京師防守糧運隨路設伏招募達兵處置軍需給銀買馬因薦都御史陳九疇總兵周尚文練達邊務可備緩急乞特賜起用 上不允起九疇准周尚文起用○詔罷大學士夏言時言久以疾在告及 上以慈壽晏駕皇太子服制議示言言承命議上進繳聖諭奏內字訛 上怒詰責之言引罷陳謝因乞還鄉治疾 上怒曰言初以言職朕命乎敬傳示令上言郊

禮自是異擢崇遷眷出群臣上何肆意恣放一至於此茲方廟災修省之初皇伯母大喪之際邊圉未靖屬主憂之時不思體念居出任意病已將平敢于求逸大負倚注本堂遣問第念往旁令削其少師致仕○虜入大同塞大掠太原諸處先是虜酋遣叛人石天爵來求入貢 上曰虜情叵測假詞給我耳命舉大臣總督宣大軍務廷議舉副都御史張珩珩力辭遂罷去乃以樊繼祖往發帑金九十萬遣科部官贊理命發石天爵至鎮繼祖乃逸之去遂以我邊無備報虜酋吉囊遂率衆入塞搃督代州三關副總兵丁璋出師至寧武關東北十里石湖嶺遇虜力戰死之虜遂入關繼祖坐視不能救縱其深入山西太原遊擊將軍周宇禦於太原北侯城村力戰死虜遂入省城又越而南殺掠人畜數萬京師戒嚴乃起翟鵬總督京師南面及山東河南軍務既而吉囊出關未至塞上俺荅復入又越太原而南至石州殺掠益衆 上命繼祖

發兵應援先給丁璋喪具五十兩○九月命大同紀功給事中張翔翼御史張光祖勘覈功罪時巡撫大同史道已召回部而代其未至又值內艱乃緣經從戎斬獲虜級于長安嶺及三山塾等處總督樊繼祖疏報兵科給事中龍遂御史傅鎮因上言山西巡按王達謂虜從容出關調至延綏大同兵並未見敵直隸巡按譚學謂虜回未戰同時矛盾宜行查覈上命紀功科道勘實回奏既而翔翼光祖往覈奏言山西三關先於八月間被俺答阿不孩深入數百里殺掠極慘于時皇上責大同諸將論繼祖嚴加邀擊迺諸將漫不加警俾虜得志徜徉而去曾未三日而吉囊之衆自平虜衛入時繼祖駐師大同左衛若合力拒戰虜必引去乃爭相斂避令虜長驅入寧武關而興嵐汾石之間再遭屠毒夫俺答之入寇也當繼祖承簡命之初倉卒調度責效固難及吉囊之入寇也正繼祖閱兵大邊之日將師雲集發蹤甚易顧乃漫無籌畧縱

虜入關受命云何節制安在宜極加訓飭其以後功上令戴罪督兵毋負簡任既而遣侍郎張漢往賑山西被虜郡縣○詔收繫翊國公郭勛於獄先是勛怙寵專恣所為多不法大獄于士夏言惡之時駙馬都尉崔元亦得上寵嘗與勛及成國公朱希忠並召見燕語元乘間發勛罪上領之禮科給事中臧賢因劾勛逞肆克狂假擅威福田園甲第併吞遍於京師水運陸輸培克及于天下上猶置不問既而李鳳來復劾勛下都察院指實陳奏覈勘未覆而刑科給事中張允賢復奏言都察院聞命四十餘日遷延不勘畏勢豪而慢朝廷上曰郭勛等乃敢蔑視國法送鎮撫司拷訊令勛從實陳狀收其黨孫濬等時連及駙馬謝詔英國公張溶惠安伯陳鏞俱下獄勘問勛疏辯上允之命給以勅勛私心不便勅久不領科道官復摘疏中有臣姦何事臣黨何人又有臣實不敢深懷怨望何勞皇上賜勅等語言顯是不遜上大怒

曰何必賜勅等語豈臣子對君之言殊為強悍陳鍊王廷相挾同抗違一併勘奏御史胡守中勛黨也知上意有在亦劾勛結納緹卒奪廠衛機權侵軍餉闡商貨怨望不忠輕視勅書不屑領受諸奸勛三上章自理不聽于是工科給事中高時遂盡發勛奸利事言勛罔利無厭近侍內臣亦為併吞託鄉紳為腹心布官校為爪牙以張延齡包藏禍心罪在不赦與之交通經紀其家心豈無為違禁儲粟以數萬計積而不散復欲何為至于器用違式僭擬不度私交朶顏諸部市易茶馬尤駭觀聽目者都尉謝詔英國公溶憲安伯鑾均朝廷勲戚罪微于勲皆置之法勲之過惡重巨羽翼尚多宜置重法永絕禍胎上深然之乃下旨曰郭勛受朕恩眷出群臣上乃結納逆囚包藏禍心跡此一端他可知矣即逮繫按治以聞言官耳目所寄若此重情無一言及本宜重懲姑且不問高時能進讜言加俸一級○冬十月乃還大學士夏言復入

閣先是上命罷言言測知上怒因奏禦虜十四策且曰臣甫解机務之初適有門庭之寇事勢孔棘關係安危一得之愚不敢不獻至于他嫌非所敢避臣何敢忘皇上眷遇殊恩默默以去也上曰夏言既有忠謀如何堅於自愛負朕恩耶本宜究懲姑念昔勞宥之既而言入詣迎和門辭賜酒饌無逸殿仍令還私宅調理以俟後命至是復命以少傳入閣○召起原任吏部尚書許讚復職○十一月詔革餘鹽法初鹽法開中有常股法需次支掣有存積法以待不次之需俱令商人輸金實帑就各運司掣鹽行鬻既而有餘鹽法令商人輸金運司就場收鹽與常股並掣夾運以鬻然自餘鹽行而存積之法廢運司積輸無幾而邊帑日虛良法益壞時戶兵二部集議裕邊急務以清理鹽法為要請設都御史一人專理長蘆山東兩淮四運司鹽法給事中郭墜上言官不必設唯當酌議應革事宜下戶部覆議尚書李如圭言鹽法不行

由占窩賣窩之弊未革商人無利其餘鹽似難輕革 上曰變亂鹽法起于餘鹽邊儲不充私鹽盛行正由于此其亟罷餘鹽惟遵祖宗成法行之于是如圭復查覈言兩淮鹽額六十九萬六千三百兩浙鹽額四十四萬四千七百六十九引長蘆鹽額六十萬五千三百四十八引並無額外餘鹽之數至于餘鹽係近歲新增宜行革去當自二十一年始悉復舊法勿復增減因條上四事曰禁餘鹽并禁榷勢置印簿別邊俛詔如議行○南京給事中王燁等論劾兵部尚書張瓚不報燁等言瓚與郭勛世居京都媾結親識凡推舉將領關節交通街衢有叅將千金都司八百之誦今勛逮詔獄天下臣民皆舉首加額以為大奸之去宗社生民之福而瓚猶在位何以激天下忠義之氣弭戎狄玩侮之心乞將勛正法瓚罷斥則人心鼓舞而醜虜不足平章下所司遂寢○翊國公郭勛論死初勛下鎮撫司乃行五萬金賂署司指揮孫綱綱為縛

錄微事具獄以上既而下刑部郎中錢德洪按綱所簿予以輕比及移囚都察院掌院事毛伯溫劾綱以廝役濫膺近侍納賄行私郭勛不法如裁邊郎開礦峒復鎮守罷巡閑潛通夷虜侵奪田廬密殺人命鑿傷地脉皆隱飾不舉情本故出法當併論刑部尚書吳山惟憑成案罔顧重獄郎中錢德洪法律不諳事理未達俱宜加懲以警怠曠 上命收孫綱訊治論罪逮繫德洪奪山俸三月刑部再論勛乃坐勛殺人律罪斬長繫待決○乙巳金星晝見○詔逮繫巡按陝西御史浦鉉請京訊治時鉉上言近見高時疏劾郭勛特加俸級而楊爵首訐勛罪尚繫于獄臣初不知爵為何人今行部至富平察其平生兄亡而挂冠養母毋逝而廬墓與思足跡不濡于城市請謁不通於郡邑荷陛下錄用而積思陳諫乃移孝以為忠也乞宥之以開納諫之門作敢言之氣 上怒命遣官校逮繫鉉詔獄○以胡松為山西叅政三閩備用時松為山

西督學副使乃上禦虜十二策凡萬有餘言深切利弊本兵忌之覆稱
松謙克實三閔兵馬其策可從乞遷松山西叅政命三閔備用自行已
策然叅政非憲職又不預松兵柄竟以不效斥罷○十二月詔宋儒程
頤二十八代孫程心傳襲五經博士○巡按江西御史沈越請申飭社
倉法從之先是言官建議備荒之策宜倣宋臣朱熹社倉之法後多廢
格不行越因上言乞勅戶部申明行天下各府州縣鄉倉之地不許廢
鬻在倉之穀不許變易積穀之令不許寢格仍令有司官負自行相勸
令鄉各有倉倉各有積撫按官每歲稽其成功驗其勤惰以行賞罪開
報吏部課殿最以行黜陟疏入 上令戶部亟加申飭以裨荒政○詔
收訊薊州總督兵部侍郎胡守中初守中為御史寅緣改宮僚進副都
御史兼詹事府適兵部議遣大臣督薊遼邊事 上特命守中為兵部
侍郎以往及至鎮多乾沒內帑金又出塞伐古松數萬株建來遠樓謂

便於哨探而虜騎長驅遂無捍蔽復索 萬商宿將金錢邊士怨之巡按
御史洪垣疏劾不報既而南京給事中 王燁上言張瓚嚴嵩胡守中皆
與郭勛陰相結納互為奸貪而守中近一凶勛敗復抗疏劾勛始附其勢
以罔利終尾其敗以脫禍此小人之尤一而任以薊州軍務臣知其不堪
命也乞賜罷斥亦不報至是禮科給事中 章允賢奏劾守中言克犯郭
勛拘囚重擬又併黨與而悉除之至會審之時他無一言獨謂守中恩
以讐報則勛得勢時守中同惡相濟昭然甚明聞其初結納拜勛為義
父家奴孫淮等亦與執袂為友自濫任薊州假以修建多被浸漁如責
報上中下三百六十家雖都御史翟鵬亦以上戶被徵科罰諸將領動
以百千計巧立名色黷貨無厭又令其子 學從往來交通關節浮誇欺
罔取玩四夷區區來遠樓之建何足為塞外之大觀而日勤夫匠絡繹
騷然又遣昌黎李知縣遠投賄金賂結貴近窺伺向背倏忽去來蓋小

人之無忌憚者也。疏入。上怒命收執守中及其子并昌黎知縣等俱送法司鞫問。秦王蜀王唐王各上黃金千兩白金萬兩助建宗廟。詔各加歲祿二百石。王帶一蜀王受帶辭祿。

壬寅嘉靖二十一年

春正月壬午朔命戶部遣官督催山西河南積逋宜大邊糧。從總督宣大尚書樊繼祖之奏也。○刑部會訊胡守中論斬時刑部尚書吳山等會鞫守中結納權貴獵致顯榮妄選軍政擅開武科侵盜帑金橫索部將造連屏而瀆獻動金鼓以入都擅伐邊樹自撤藩籬啟虜夷奔突之患毀邊疆制禦之防法當斬首其密雲副使段續張冕李文芝荊州叅政李允升叅將周楫等畏威阿勢甘心聽從並宜坐罪詔從之。○議修大同邊垣詔罷之時議脩築大同邊垣總督尚書樊繼祖恐虜蹂躪不能築巡撫龍大有謂外邊遠不可築內邊難為力俱乞停止。本兵張

瓚覆言大同地方先年既設外邊復設次邊以界限華夷尺寸皆金湯也。今圯壞不修恐醜虜竊據永無恢復之日。昔河套棄而陝右多事西河棄而甘州多事大寧棄而薊州多事三岔河棄而遼東多事懲前慮後乃知兩邊修築亦一時權宜但地方廣遠公私匱竭果難為力。上曰修築邊垣防禦要務但去歲醜虜深入得利今秋計必復來宜以整兵防禦為急修築姑暫停止。○二月詔罷總督大同尚書樊繼祖奪山西巡撫陳講前大同巡撫史道官為民先。給事中徐燝上言山西巡撫陳講虜未入而誇張請乞虜既入而畏避退縮大同巡撫前則史道擅放夷使石天爵繼則龍大有觀望因循不即之任薊州巡撫徐高無一善狀四年遂躋都臺遼東巡撫孫禴部運未還遽陟顯擢計邊境大臣若斯是可為寒心哉。總督尚書樊繼祖帶百萬之糧餉連四鎮之甲兵坐視應朔任虜出入古之以身殉國者顧若是以未免北顧

之憂耳章下兵部至是言官復交章劾繼祖縱虜深入殺將喪師宜加罪誦 上乃勅令罷歸陳講史道削籍為民宣大總兵王宣白爵俱罷總督翟鵬亦以虜去畿輔無事遂召還京○進封安平伯方銳為安平侯 上勅吏兵二部朕躬奉皇妣孝獻皇后几筵痛憶遺音周足三期贊成朕孝后妃列御宜加恩遇銳進封侯○南京吏部尚書吳一鵬卒謚文端○兵科給事中胡賓以近畿荒歉請議處發糶從之賓言通倉糧米已積六百餘萬石而邊方多事惟賴銀兩給發乞將該倉粳米一百萬石減價發糶以實銀庫濟急用部議以為可從○虜掠蘭州○詔城臨清從山東巡撫曾銑之請也○三月復以翟鵬為兵部侍郎總督宣大偏保山東河南軍務既而罷之遂革宣大總制官時邊臣奏報虜衆復至乃復命鵬總督軍務鵬將行候辭輔臣夏言未面即去言啣之鵬至鎮奏乞邊餉言謂樊繼祖買積芻粟尚未動支如何在在空虛

上命覈之至是鵬又言據降虜言賊已會衆二十萬將入犯乞亟調陝西薊遼各兵赴鎮并令多發鹽銀以備軍需 上曰鵬受新命首索帑銀舉措已乖况出京日久尚駐宣府抗命急事深負委託姑革職間住因併革總制官專責大同龍大有宣府焚書山西劉泉保定劉隅四巡撫防虜○承天府督工尚書顧璘進所輯輿都志因疏陳輿都禮制三事一定舊邸之官職言當與南京內府相同一正廟祀之樂章言當以皇上下狩山陵聖製詩歌製為樂章以享陵廟一謹祠祭之供事言當以陵寢供事責之奉祀祀丞隆慶殿晨夕上食責之司香 上報可○詔進夏言特進上柱國少師吏部尚書華蓋殿大學士時言九年考滿上賜鈔幣吏部以先年楊士奇劉健勅宴例請命復勳階如舊賜勅褒諭○夏四月詔建大高玄殿於西苑奉祀上帝也○詔松江府增設青浦縣巡撫夏邦謨巡按舒汀會議請割華亭上海設青浦縣從之○

山東巡撫魯銑討劇賊劉儀等剿平之時儀等嘯聚魚臺之獨山鼓衆倡亂銑檄兵備副使金清等捕勦擒其首惡衆皆潰散乃上其事 上嘉銑功賞銀幣加清官級○裕享祖宗列聖于景神殿命成國公朱希忠代○掌都察院事毛伯溫請申明憲綱因陳八事曰禁酷刑慎舉動革騷擾懲豪勢省繁文職守正士風備建造 上嘉之曰振舉綱維切中時弊悉令允行既而言撫按所屬官員六品以下罪狀顯著即自問黜不必槩劾給事中沈良材言通判推官知縣職在親民若槩稱六品例不得劾恐欲問黜則罪惡未顯欲指劾則于例有違宜令一體舉劾俟部議處分其罪狀深重者照例問黜不必劾奏 上從良材言○五月謫清紀郎周鈇外補鈇言虜必再至乞早為防禦計不聽謫廬州府知事○詔進兩廣巡撫蔡經兵部尚書加安遠侯柳珣少保時瓊州黎賊亂經等遣兵剿平之 上命加珣少保進經兵部尚書鎮守如故

○改工部尚書顧璘為南京刑部尚書○御史黎循典疏請開墾山東荒田言費縣沂州剡城嶧縣滕縣地方野有曠土積逋甚多宜下所司招撫流移令復舊業措處牛具種子假以歲月免其征役使得盡力田事少裨國課部覆從之○提督兩廣蔡經等討思恩九司之亂勦平之先是思恩軍民府既改流官分設九巡檢司用土目分理之興隆司土巡檢潘良者貪淫殘虐為衆所怨恨土民劉憲盧迴等因誘衆作亂聲稱欲盡除九司之官復流為土勢頗猖獗經會通總兵安遠侯柳珣議遣副總兵張經叅政翁萬達等督田州各土兵勦之副使陳茂象撫輯其衆三千餘人至是且三年九司悉平巡按御史何瓚劾上諸臣功次詔經珣賜勅獎勵仍各賞銀幣有差○衍聖公孔聞韶以母喪乞家居終制許之○命以陝西開納事例銀三萬兩賑濟延綏榆林二鎮及折放軍士月糧從督撫官請也○詔戒諭琉球國王尚清初漳州人陳貴

等私駕大船下海通番至琉球為其國長史通事蔡廷美等招引入港
適遇潮陽海船爭利互相殺傷廷美乃安置貴等舊王城盡沒其資貴
等夜奔為首者所掩捕多見殺國王尚清知之下令國中乃止至是械
繫貴等七人誣其為賊遣廷美等賫表文送至福建欲赴京陳奏巡按
御史徐宗魯會同三司官重加詳審列狀以聞廷美等待命 上下部
議部臣覆奏貴等違法通番自有律例但琉球國王尚清縱容夷人屢
次交易又奪取貨物羈留人眾橫肆屠戮復誣以為賊其欺慢恣肆宜
加切責仍聽本部移咨戒諭不得輕與中國商民交易詔如部議○詔
遣官存問大學士毛紀紀家居二十年至是年八十山東撫按以聞
上曰紀輔弼舊臣年登八袞德壽並茂其賜以羊酒令撫按官及門存
問乃月給食米輿夫以示優眷○上製濟疫小飲子方頒所司遵用濟
民○湖廣寶慶府邵陽縣妖賊平事聞 上賜巡撫都御史陸杰銀幣

餘各陞賞有差○詔施藥餌時都城疫癘盛行死者枕籍禮部左侍郎
孫承恩請命太醫院及順天府惠民藥局依按方術預備藥餌施給以
濟貼危 上從之○上禱雨有應群臣表賀時久旱不雨 上乃躬禱
於大索殿得雨數日乃止 上甚喜輔臣等皆進表稱賀俱優詔答之
○閏五月詔革周府將軍安溜為庶人河南巡撫魏有本上言河南諸
宗人缺祿米三百萬石諸將軍安溜等五百人譁推行臺門凌逼撫臣
安溜遂坐革為庶人既而王及宗人獻白金六千兩助修太廟 上命
賜王帶一圍衣一稱○熒惑入房宿四星中央相守月餘芒角甚怒○
六月虜大入塞時吉囊病死其子板不孩居套中小王子不及兒台吉
駐威寧海上俺荅糾數酋經朔州至廣武天屹峽攻墻我兵敗績乘夜
趨鴈門沙溝墩越關南代州薄大原城門外無所掠大肆焚燒指揮王
倫等率壯夫以矢石火器斃賊十二人虜復焚演武場移營南走京師

戒嚴先是兵部奏言頃者大同山西虜報沓至防守事宜奉旨已行但虜詐叵測倘自宣府獨石邊外突入潮河古北黃花密雲地方則震驚京師宜令薊州總兵祝雄分兵駐密雲督同叅將王繼祖設伏古北等處禦之并令遼東錦義叅將趙國忠駐寧遠城以為薊州聲援通州國儲所積宜令東西廳整兵一枝俟警即發守通州至于京師尤宜戒備行紫荊副總兵周徹遣兵先戍保定倘虜深入關南即調至琢州擁衛京師 上是之及虜軍朔州守臣以聞 上示兵部曰宣大二鎮屯戍重兵正為山西畿輔藩籬往者虜賊入邊殘害山西驚動畿輔守臣踵為故常失事已甚即令能協力戰守俾虜大挫而去則先賞宣大諸臣之功其或彼此觀望致虜猖獗者必罪無赦○詔加總督漕河兵部右侍郎王以旂俸一級先是徐呂洪渴漕舟滯不行遣以旂督治至則先求故道視泉脉循經流塞分殺自徐洪南抵沽頭增置閘又相地形引

水壑築土壩河流時漕艘皆如期達京師汶上寧陽之間有水櫃四勢豪浸沒獻德邸藉灌溉為私利以旂上言水櫃以備畜洩河溢則懸河以入湖河溢則懸湖以入河遂任怨力復水櫃迄今賴之至是巡按山東御史楊本深巡按河南御史趙繼本上言黃河孫繼口李景高口扈運口俱已疏通徐呂二洪水勢通行糧運無沮 上悅詔加以旂俸一級餘各陞賞有差○秋七月己酉朔日食既詔罷大學士夏言 上下勅曰天心下眷累及太陽正臣子欺君父外陰侵內陽之咎也夏言以臣凌君罪不下郭勛第累年供事內苑故特宥死去之用承天戒仍修省三日祇告玄極殿大小臣工宜既乃心共圖濟理先是 上手勅諭都察院左都御史毛伯溫布示臺諫等官曰朕承皇天寶命以神王二道裁理天下非求仙用夷荒昧之為止一早朝終始不一然君逸臣勞先賢亦嘗言之柰何世降人浮求一真才夾輔終不可得昨夏言測

知東宮遷移無故欲改慈慶殿為東宮府廢母后制以縱奉子朕必不為往歲令高忠代獻玉器又獻女子朕詰忠曰祖宗家法何如爾可交結文臣耶又聞言乘輿禁中召引者詰之對曰非輿橫板舁之迨朕以香葉巾便束髮皮帛履便啓處因言入內直賜之言曰時人正瞪目視我此不可受朕聞之命言出言曰即別下旨乃可去耳此非變詐而何且朕不早朝言亦不赴內閣一人在第其二三人者雖入亦不知軍國重務王言須密豈宜人臣視如戲具此等鉅惡言官不聞糾發直貪生媚寵今日神鬼皆怒雨甚傷禾卿等其布此諭中外知之于是御史喬祐等給事中沈良材等各連疏劾言上曰臺諫為朝廷耳目而結合欺罔不思盡職命吏部都察院考覈以聞言乃上疏自劾遂革職閒住既而大計臺諫官共七十三人奪級外補居半○禮部右侍郎呂柟卒柟高陵人性穎敏誠確力學慕古與馬理康海皆有名關中以進士

第一人除翰林修撰逆瑾以柟同鄉欲引附已啗以入閣柟絕不與往來瑾憾之且欲中傷之會瑾敗得已後累至今官卒久之追謚文簡○南京刑部尚書周倫卒謚康僖○復以翟鵬為兵部侍郎兼僉都御史提督宣大備保山東河南軍務時部議言虜在山西勢甚猖獗各鎮守巡官軍因無總制未免各分彼此乞會同推舉忠誠有將畧者上命原總督宣大翟鵬復任給事中劉繪上言頃者北虜南侵陛下勅翟鵬往督軍務臣以為虜遁而總督輒罷虜至而總督增設事出倉猝機不素定非所以專責成而圖成功臣今請專任翟鵬凡兵馬錢糧悉得便宜從事上是之因詔鵬先發後聞紀功科道官其倣古監軍之制擇廉能任事者往兵部尚書張瓚因言簡命翟鵬可謂得人第我兵積怯非大破常格嚴示誅賞無以激勵士心上以為然令擒斬俺答者賞千金不次陞拜其次酋首三百金加三級臨陣退縮者自都指揮以下

徑自斬首總兵以下先具死狀戴罪殺賊○虜掠上黨平陽諸處副總兵張世忠躡虜力戰死之虜出和陽塞時俺答青台吉呪刺哈哈刺漢及叛人高懷志李天章各擁萬衆越太原列營汾河東西散掠上黨平陽下邑翟鵬時尚未至我師連營真相攝觀望不肯戰縱虜深入虜大衆駐平遙介休間散入險山中殺掠人畜諸將竟不肯乘險邀擊虜掠男女牛羊衣襍迺遷就大營結陣整衆且歸世忠等自侯城村起營盟約諸將躡虜力戰諸將閉營不相援虜見世忠軍壯戰又力呼集精騎三千餘合圍世忠世忠憤曰諸將獨不念血盟耶世忠被箭傷裹創下馬四面布戰虜亦窘會矢火藥盡世忠憤呼曰我軍被圍戰苦諸將竟不相援國憲天刑寧汝追耶復上馬往來督短兵血戰自己至酉虜見我兵死傷衆無援又戰力竭遂躡我營世忠頭中二矢墜馬死部將張宣張臣等痛世忠死率旗軍會五等力戰宣臣亦死虜既殺世忠等乃

復分掠定襄孟五臺又自代州出鰲峯靈丘廣昌掠殺人畜萬計徙廣武站出關安行自大同左衛及陽和塞去虜自六月丁酉入塞至七月庚午凡掠十衛三十八州縣殺擄男女二十餘萬牛馬羊豕畜二百萬衣襍金錢稱是焚公私廬舍八萬區蹂田禾數十萬頃既而贈世忠右都督予八十金宣臣各四十金仍立祠祀之○議築京師外城不果時邊報急御史焦璉欲建外城如南京上命速議給事中劉養直以為宜建於無事之時不宜築于有事之日且廟工方興材木未備若并力築城恐官民俱匱乃罷議○巡按江西御史沈越疏請橫峯窩開設縣治許之先是廣信府弋陽縣橫峯窩鎮乃外省人民及處州礦徒流寓雜處開山挖土燒碗營生而山居士惡性悍素習頑野屢為梗擾後設立府館添注捕盜通判以制馭之然不過往來往劄而了嚴寨巡檢司又無能為前因歲饑缺食爭搶幾成太患越檄廣信檢校管景往勘之

景乃宣布盛德作勸善懲惡箴以示之盜多悔過悔過散去時縣民王庸等議開設縣治欲割上饒十里鉛山二里并弋陽十里設為一縣越因上言橫峯窰地僻民稠止以燒造為生且人多貧薄俗皆勁悍稍遇饑饉輒聚搶掠良善被其殘害鄰境亦多驚擾是以王庸等奏欲立縣出於民心悅從且開設縣治則通判巡檢俱當裁革改設官吏俸增不多况基止工料民皆願助則衙門房屋財不多費其分撥都里則又值大造黃冊過割俱便誠保安地方之長策也乞勅下部議俯順民情可彌將來之亂階成新邑之美治因條上開設事宜 上詔部議行之○進少保兼太子太保禮部尚書翰林學士嚴嵩武英殿大學士忝預機務仍掌部事 上以夏言罷進翟鑾少傅謹身殿乃以嵩入武英殿同鑾辦事給事中沈良材御史童漢臣等上言嵩貪淫猾惡皇上洞見而以為輔臣是小人而乘君子之器也其背公營私變亂國是必將無所

不至南京給事中王燁等劾嵩險詐姦回貪婪又著者若處以具瞻之地是樹天下之貪標也且其子世蕃克玩狡滑同惡相扶實之政本必為國禍南京御史陳紹等亦劾嵩比昵匪人貪黷貨賂言官屢形論列莫逃聖矚今以機衡之重畀之必不能回心易慮公爾忘私俱不報○詔罷山西巡撫劉臬時給事中劉繪劾臬納賄姦黨一籌莫展冒破帑銀修築邊牆且掩敗稱功專肆欺罔而宣府巡撫楚書沉酣高卧將士離心久握重兵邊備日弛俱不職宜罷因薦平陽知府聶豹參政王儀於教其才可當一面部議劉臬失事重大不容辭責應革職聽勘楚書才乏振揚亦無亡失應回籍聽調 上從之因起原任巡撫趙錦于大同李珏于山西王儀于宣府任維賢于延綏既而維賢又為給事中馮良知所劾自是更調紛紛邊臣益務欺蔽以避罪○己亥熒惑犯南斗○九月復餘塩法吏部尚書許讚請復開餘塩以足邊用戶部議覆從之

餘鹽復行○巡按江西御史沈越疏舉遺廢以備任用上言帝王用人每切求舊人臣効職莫重薦賢蓋以老成宿德之臣治體多練而廢置遺佚之久砥礪必深于此甄收錄用必能奮起事功感恩圖報與新進初士之作為自有不同 皇上詔舉遺廢誠堯舜孳孳求治之心臣仰體明命恒切甄求所據郡邑廢置官員如原任刑部尚書周期雍兵部侍郎簡霄右都御史萬鏗左贊善羅洪先給事中曾忭詹泮御史魯孔化郭弘化副使江以達王奠恭議王臣知府何祉或因自陳或因詿誤各罷家居沉淪既久動忍益堅是皆適用之器難得之才乞勅吏部察訪錄用庶幾有用之才不終于無用之地而于治道亦有補萬一章下所司○詔逮繫工部員外郎劉魁于獄時建雷壇魁上言請緩雷殿工作以成廟建足邊備 上怒廷杖長繫鎮撫司○冬十月郭勛死于獄○宮婢謀逆伏誅及貴妃曹氏時 上幸曹妃宮妃寤官婢楊金英等

怨 上共謀行弑侯 上寢熟以組縊之而誤為死結謀得不遂監宮張金蓮知狀亟走白后后中夜聞變曳裾馳至為解項組 上得蘇病不能語后命左右收金英等十餘人併曹妃俱磔于市時事起倉卒妃實不知 上後知妃死常憫其冤既而族金英等家以討定宮變勅諭中外○大學士嚴嵩乞罷不許時言官童漢臣伊敏生喻時等劾論嵩不已巡按四川御史謝瑜上言天下之人皆謂堯舜相繼百有四十年其至治可名在四罪而天下咸服今郭勛胡守中張瓚嚴嵩為聖世四凶陛下旬月之間誅殛其二而張瓚嚴嵩二凶尚存何不投之流之以全堯舜之功嵩上疏乞罷 上勉留之嵩復上言臣蒙陛下勉留感激涕流莫知為處雖聖斷不疑而豺虎為群向非聖明委曲保全臣闔門不知死所夫豺獺尚知報本臣豈忍負恩私敢于求去顧臣之心跡雖自信無媿而言者或聽嗾使或修舊怨日復一日轉相猜忌恐九重高

遠何由盡知獨有一去可以塞詆誣之口 上曰卿安心供事再有賣
擾者重治不宥○兵部尚書張瓚卒瓚屢被言官論劾皆有顯跡 上
終不去之至是卒卹典加隆○以毛伯溫為兵部尚書先是給事中任
瀛見宣大連有虜患復劾張瓚貪鄙無為因及職方郎中楊博俱宜罷
免不聽瓚卒于官乃以伯溫代瓚 上曰卿總司憲綱久著才望兼以
南北征伐諳練戎務故特以本兵任卿伯溫以瓚素貪邪諸邊類多債
帥乃上言請禁沿邊將領措剋營求之弊 上納之命都察院刊榜禁
諭伯溫因奏薦楊博才識通敏曉暢軍情向隨輔臣翟鑾巡歷九邊備
知夷狀今年資已深例宜遷轉乞勅吏部仍留供職積有勞勩不次殊
擢 上從之○十二月詔開屯田時南京給事中王燁上言虜患繹騷
邊儲空乏欲為久遠之計先寬屯田之徵凡沿邊地有能佃種者悉與
為業永不起科貧者諒給牛種仍令遊騎巡察以防侵掠 上從之令

督撫巡按榜諭地方凡堪種地土許開墾成業永不起科○詔奪國子
司業王同祖官為民先是同祖上禦虜策請因朵顏三衛賂結黃毛虜
又糾兀良哈亦不剌等夷共破北虜御史賈大身劾其狂悖至是又請
改元以延聖曆 上惡其佞斥之削藉為民○象山縣黃霧四塞時雨
黃霧行人口耳俱塞○給事中蘇旻請召補京管軍士不許旻言京管
軍士尚缺二萬乞募民充補下兵部議尚書毛伯溫覆言今日之事不
在足兵而在選兵不在生財而在節財若所募匪人不特無益營伍抑
且虛費糧賞臣謂募兵之議暫宜停罷第令見在軍士時加操練汰其
老弱冒替者使在營皆可用之兵無坐食之患為可耳 上從部議○
以兵部侍郎王以旂為南京右都御史以旂以處父母之邦持重法乃
務屏騶從清庶獄出入稀簡每謂諸子曰昔張湛入里門必步可取為
法也後以病瘍疏辭解任溫旨勉留尋瘍亦瘥復召入為工部尚書

大清
乾隆
二十
九年
夏
月
...



